


20

Lat.





STONS / 181571  
XANC / A K O S

DE / 181571  
VIRGO PER VANA

Tem Ordine: Sacerd. Pater

DO S / N I C I

Compendio enarrat.

Prima Roma

Secund. Veritas in Potestate, recalc.

Quod & omnia Imperia

181571

TRACOVIA

Secund. Rationum Prologus

R.M. Typogr. A. 1815

Prima (Prima) Veritas





SPONSA CHRISTI  
SANCTA ROSA  
DE S. MARIA  
VIRGO PERVANA

Tertij Ordinis Sancti Patris


DOMINICI

Compendio enarrata.

Prius Romæ

Nunc iterum in Polonia, recusa:

*Cum licentia Superiorum.*



GRACOVIAE,

Apud Stanislaum Piotrkowczyk,  
S.R.M. Typogr. A. 1671.

*P.P. Eremit. Camald. Montis Regij iussu  
G. S. S. S. S.*



Delicium cæli, flos & lectissimus Orbis,  
 Peruano creuit, quæ R o s a pulchra, solo.  
 Dum sibi Magnificus per Te Placidissime Myster,  
 In Triados templo congeminatur honos.  
 Cælitus ipsa tibi faustissima quæq; precatur.  
 sis placitumq; Tui, corq; caputq; , gregis.

B. J. Biem. B. V. 3

In Limenses Spinas

SANCTÆ ROSÆ,  
ACROSTICHIS.

Res noua Christe tuas pungit ROSA dia  
medullas,

Opprimat auricomum cūm fera spina  
caput.

Spinis en roseis configeris ô bone IESV!

An decet à tenerâ spina molesta ROSA.

Lima mihi dulces spinas producit amoris.

Infligit cordi vulnera chara meo.

Me ROSA Limensis soboles placidissima  
terræ,

Eiaculans animo spinea tela suo:

Non segni figit iactu, sed figitur ipsa,

Spinis, & pariter concalescēt ipsa meis.

Inque vicem, nostras spinas sentimus  
vtrinque,

Sic ROSA spina mihi; sic ego spina  
ROSÆ.



E C H O  
R O S Æ A M E R I C A N Æ  
I N  
E V R O P Æ  
R E S O N A N S P L A G A.

<i>Responde gelidus, habitans conuallibus</i>	ECHO
<i>Orbis cur laudans I, ROSA clamat?</i>	AMAT.
<i>Hæc mundi spinas tollet, dans prospera:</i>	SPERA.
<i>Cunctis nec rerum copia deërit:</i>	ERIT.
<i>Hæc &amp; Lechiadû pacem reparabit.</i>	ARABIT.
<i>Et bellum fugiet triste Polonus:</i>	ONVS.
<i>Sic sic ad Diuam, precibus concurritur:</i>	ITVR.
<i>Et ruro tendit, remige nauita:</i>	ITA.
<i>Da ROSA, nunc roseos annos da viuere:</i>	VERE.
<i>Atque frui cælo, post bona fata:</i>	DATA.
<i>Si mihi vera refers Echo ipsa Valeto:</i>	VALETO.
<i>Donec Nostra iterum, dicta nouabû:</i>	ABIS.





SPONSA CHRISTI  
BEATA ROSA

De Sancta Maria, Virgo Peruana, Tertij  
Ordinis S. P. Dominici, Compensatio  
Enarrata.

C A P V T I.

*B. Rosa Natales, Indoles, Educatio, votumque  
Virginitatis.*

**R**OSA à Sancta Maria, Flos delibatus terrarum orbis nuper inuenti, patriam habuit Limam, Regiam Peruuiae Urbem: Parentes Gasparem de Floribus, Mariam ab Oliua, stirpe, non item opibus, nobiles. Illam Mater anno Virginei partus 1586. die Aprilis vigesima, enixa est, felicissimo partu, solita ceteroqui in aliorum puerperijs mirè torqueri: & prodiuit Infans secundis pelli- culis inuoluta, veluti nascuntur Rosæ. Isabellæ no- men inditum illi fuit ab auia materna Isabella de Her- rera. Sed cum à matre, alijsque visa fuerit reparanda Rosa insidere vultum trimestris paruulæ in cunis quie- scentis, hoc aliud nomen à prodigio traxit, & Beatif- sima Virgo mystica Rosa, iussit illam annis aduclam à S. Maria cognominari, adeoque prima forsan hæc fuit, quæ non solum diuinitus nomen, vt alij, sed & co- gnomen acceperit. Eadem infanti Rosæ, quæ D. Ca- tharinæ Senensi, indoles quieta, suavis, lepida: nun- quam stridulis vagitibus turbauit ædes, plorauit nun- quam, nisi cum semel in alienam domum illata ciula-

*Compendium Vitæ*

tu poposcit maternas latebras, iam tùm sibi gratissimas. Prodigiosum specimen heroicæ tolerantia, trimula exhibuit, namque dextero pollice ab arca, dum properè clauditur, fortè correpto dolorem egregiè dissimulauit, & manum abscondit, matri eò properanti. Hilaris deinde, sensit acribus remedijs totum ferè vnguem absumi, & residuum lento, ac violento forfice radicitus auelli: attonito adhæc Ioanne Perez Chirurgo, qui tantillam Virginem gemere, aut expallescere nunquam vidit, tempore acerbissimæ curationis. Et præcisâ nouaculâ, vitiata pars auris, & caput, ob adhibitam improspere, ab imperita matre, noxiam medelam, bullis turgidum, ac fossulis profundè vlceratum, à quadrimula Beata Rosa gemitum nullum, aut molestiæ notam expressit, cum tamen acerrimus dolor, totum corpusculum identidem improuisa agitatione concuteret, & solidam noctem sub efferi cruciatus ardore voraci transegisset. Duos supra quadraginta dies, vt nouam cutem induceret Chirurgus, Virginem lancinavit: ac deinde sexenni ex intimo nare phaseolum tertio tractu demum exemit, obdurante in his tormentis Beata Rosa mira constantia. Hæc rudimenta spinarum, nostrum florem excoluere, vt gratissimum Sponso, in ipsa infantia, odorem exhiberet suauissimæ charitatis. Fortè puer virgunculæ frater, inter ludendum, luto illius comam imbuerat, quod cum B. Rosæ, non contemptum, ac sordes auersatæ, accidisset ingratum, scito, inquit frater, concionatoris in morem, cultos puellarum cincinnos inferni rudentes esse, quibus illaqueantur incautæ animæ,

### *Beata Rosa.*

ve in gehennam æternam detraherentur. Hæc verba Beata Rosæ animum altius penetrarunt, & ad altissimam Dei noticiam, vastissimæ illius menti, aditum aperuerunt. Igitur statim exarsit in illa mirus conatus orandi, adeò vt nec dormiens cessaret à frequentibus precibus, quibus perpetim inuigilabat : Et iam tùm rapè se apertissimè animaduertit, ad premenda heroica vestigia S. Catharinæ Senensis, qua duce quinquennis B. Rosa lilium virginitatis Deo consecrauit spon- sione solemni, & mox capillos, inscia matre, sibi ab- scidit, ad vinam vsque cutem. Diuinus hic ardor, pu- eilam inuasit, sub ipsum vsus rationis diluculum, vt afferunt illius animæ moderatores, qui omnes testati deinde sunt, nunquam illam à recto tramite grauioris admissione criminis exerrasse.

### C A P V T II.

*Beata ROSÆ erga parentes mira obedientia,  
pietas, sollicitudo.*

QVòd à parentum æquis imperijs non latum qui- dem vnguem deflexerit B. Rosa, sit ordinariæ virtutis ; erit tamen prodigiosæ, quòd fuerit diuini, humanique obsequij retinentissima, cum pugnantiæ inter se Deus, ac genitrix, imperarent. Hæc filiam vexabat in dies, vt natiuam oris pulchritudinem, su- co magis intenderet ; at illam alto muliebris mundi contemptu, insultare sæculi genio, docebat Deus. Ca- piti aliquando circumindere compulsa fertur vario flo- rum genere contextum, illi ab ima parte suffixit ob-



longam acum, adeoque corollam capitî validè impressit, vt aliena manu contentis viribus fuerit extrahenda. Chirothecas, quæ delicati candoris elegantiam augerent, induit iubente Matre; sed primò dirigit, amburi dein manus experta, flammæ etiam ex odoratis pellibus promicare vidit, totum nocte intempesta cubiculum illuminantes. Ne ad nobilium, foeminarum domos deduceretur, clam indico pipere, quod mordacissimum est, supercilia, & palpebras sibi obliniebat, vt arderent oculi, ruberent, stillarent, idcirco impares publicæ luci, ferendæ, potiore ducens oculorum pupilla solitudinem, quam tanto pretio emptam genitrix illi tandem indulsit, sicut & rudem ac decolorem saccum ex obuia, vilique materia, quam pro amictu induit, mirum in modum exultans. Vel ergo matrem infinis precibus exorabat, vt sibi liceret cruentis diuini Sponsi vestigijs insistere, vel mitia imperia ingeniosè eludebat: veluti cum iussa, non lignis, at lana farcire ceruical, lanæ vim tantam operosè stipauit, vt ligno caput videretur immitti. Quid quòd non Matri solùm sine cuius venia nec bibeat, nec muliebres labores aggrediebatur, sed & domestico mancipio alacris obtemperabat, præcipuè verò cum ardua imperabantur. Cum Mater non rarò subirata veniam libandæ aquæ B. Rosæ denegaret, inscia, filiam nunquam bibere, nisi ipsa annuisset, in sex & plures dies Virgo fraudabat sitim. Hispidas aliquando pelliculas, quæ vim frigoris propulsarent, B. Rosæ manibus ex morbo contractis in cauta mater admoovit, addito imperio, ne illas abijceret; tolerauit  
 obli-

obstinato silentio B. Rosa plurimos dies mordacem  
pellium ardorem, quo accensæ manus turgidis vndi-  
que tuberculis vlcerata sunt. Quin & post mortem  
à religioso Cœnobij Præsidente iussa B. Rosa imago ar-  
gentum diù multumque frustra quæsitum mensæ su-  
perimponere, imposuit illic, animante mortuos co-  
lores obtemperandi studio. Quæ verò cetera illius in-  
parentes obseruantia, pietas, amor? exhausta viribus  
ad mediam vsque noctem laborem protrahebat, vt  
illorum egestati consuleret, & licet duodecim quoti-  
die horas diuinis alloquijs consecraret, tot muliebria  
pena quotidie conficiebat, quot alia quæuis celerri-  
ma vix quatrduo: idque tanta elegantia, & cura, vt  
humanam artem superare viderentur, quàmuis non  
rarò dum flores acu pingeret, animo à sensibus auoca-  
to, diuina intueretur. Ad hæc alebat in horto violas,  
ex quibus vænum expositis aliquod lucrum parenti-  
bus accederet: & Sponsum cœlestem aliunde miris,  
& arcanis modis supplere solitum, candidè confessa  
est religioso viro. At si forte parentes ægri decum-  
berent, lecto assidebat insomnis, parabat pharmaca,  
peragebat omnia operosissima Virgo vt solacium illis  
afferret. Hic præterire non debeo prodigiosam lati-  
tiam, quam ipsa moriens dolenti Matri, ac secum  
exanimandæ impetravit; tanta enim cœlestis dulce-  
dinis vbertas maternum pectus inundauit, vt iureiu-  
rando falsa sit, imparem se gaudio insolito perferen-  
do plurimos dies iucundissimè laborasse, & hoc argu-  
mento manifestè assequutam, quantopere fluminis  
impetus exhilarans ciuitatem Dei B. Rosam suam  
recrearet.

*Beata Rosa, ut sequatur vestigia S. Catharinae  
Senensis, Tertio S. P. Dominici Ordini,  
adscribitur.*

**Q**Vi sanctissimam Virginem Catharinam Senensem cum Beata Rosa nostra componat, incertus animi sit, indicumne hunc florem, an ex Italia translatum in Peruviam dicat; vsque adeò B. Rosa Catharinae institutum vitae, mores integerrimos, beneuolentissimi Numinis dona, & ipsa tandem lineamenta vultus expressit. Connubii, cui nobili, & honestissimo destinabatur, spem amputare visa est excidio capillorum. Sed egregia formæ venustas, acre iudicium, suauitas erectæ indolis, elegatissimi mores, sancto Virginis consilio, aduersabantur. Roseum illa candorem ieiunijs deterere, natiuam pulcherrimi vultus gratiam omni arte abolere, manus, quarum candor, & pulchritudo commendabatur, viua calce amburare, ne hominum placeret obtutibus, domi latere: adeò ut aliquando Cantam deducta, locum metalli fodinis nobilem, quadriennio nunquam pedem extra limen extulerit, ne semel quidem videre dignata vicinum deliciarum hortum, aut per celebre spectaculum molium indicarum. Plures nihilominus inuita accendit ambitu honestissimi thalami, ac præcipuè Matriona genere, & opibus clara, illa vnico filio suo Sponsam optabat, & gratissimum hoc erat B. Rosæ parentibus, ac fratribus, qui nuptiarum nomine exanimatâ, probris, conuicijs, alapis, calcibus impetebant, veluti Lapa-Ma-



ter S. Catharinam, cuius ad instar B. Rosa iniurijs omnibus æquissimo animo deuoratis; in S. Dominici viridarium tandem insita fuit, adscripta Tercia sanctissimi Patris familiae, licet illam inuita sēr cœnobia nobilissima, optarat S. Archiepiscopus Turibius, ab illa præcipuè sacrae domus, quæ tunc surgebat, fundamenta poni, B. Rosa studiosa sequi Seraphicæ Magistræ suæ Catharinæ Senensis Ideam, quam quinquennis elegerat, vitæ instituto, moribus, habitu representandam, non tamen suo consilio nimium tribuere, & parum sapiētum virorum arbitrio videretur, in viam se aliquando dederat, Sanctissimæ Incarnationis Monasterium, ingressura. At cum vltimum vale diceret Rosariano Sacello Deiparæ, visa est vt rupes adnasci solo, & frustra in pedes exilire tentauit, aduocato sapius ad opem ferendam, germano fratre, contentisque viribus conuicto; quoadusque decreto regressu ad domesticas latebras, alacritate mira, surrexit. Et alio prodigio Deus ad premenda Catharinæ vestigia B. Rosam inuitauit; nam ex Papilionibus, qui colorum varietate mirabiles Limanum agrum peruolitant, vnus nigro tantum, alboque colore pulcherrimè striatus, circumuolitaui B. Rosam, quæ diuinum hoc esse responsum intellexit, vt velut animo dudum ag. tauerat Prædicatorij Ordinis, tertium habitum amplecteretur. Ab illo serapel induto, vix non dimouit B. Rosam modestissimi animi demissio; nam gliscente eius nominis celebritate, cæpit monstrari digitis, notari oculis, laudari à prætereuntibus, ipsique D. Catharinæ Senensi, non raro comparari. Et merito; nam  
adco

8 *Compendium Vitæ*

adeò sanctæ Magistræ suæ virtutes induit, vt semel tacitè miranti Confessario, visa fuerit specie, vultu, lineamentis, sic transformata, vt viua similitudine ipsissimam S. Catharinæ Senensis effigiem referret. Demum, quæ tam carò illi steterat, vestem constanter retinuit; nam dum latendi studium illam seponendam suggerebat, ad aram Sanctissimi Rosarij flexis humi genibus, inter orandum placidissimo animi deliquio, sensim dirigit, visa ab adstantibus primò exalbescere pallore niueo, mox decora suffusione rubescere, demum toto vultu lucescere, ac scintillatim radiare, suoque colori reddita, erumpentibus ex animo prægestiente verbis, ostendit, se in hoc vitæ instituto diuinitus confirmatam.

C A P V T IV.

*B. Rosæ mira animi submissio, virginæ candor, benignitas, aliæque virtutes.*

**F**undamentum reliquarum virtutum, modestissimi animi submissio, tam altas in hac Virgine radices egit, vt suum vnice contemptum perpetuo studio quæsiuisse visa fuerit. Parum illi fuisset, domesticæ ancillæ officijs distineri, nisi & infra illam se demississet. Quamobrem sæpe Marianam agrestem seruam adigebat, vt se deiectam humi pedibus proculcicaret. Exultabat iniurijs proscissa ob singularem vitæ rigorem, at suis laudibus vulnerata, spineam coronam, qua tempora clam obfederat, violento pugno capiti altius infigebat. A Regio Quæstore, qui supremis tribus B. Rosæ annis suam domum consecrari ambiuit,

uit, flexis poplitibus aquæ libandæ veniam impetra-  
 bat. Morbos celare consueta, ne medicæ sibi manus,  
 & delicata remedia adhiberentur, aliquando tamen  
 candidè fatebatur, quantis cruciatibus distabesceret,  
 ut crederetur ob immania crimina, à vindice Numi-  
 ne flagellari. Quin & mirari se, cur nondum terram  
 infelicem, quæ suis piaculis onerabatur, abyssò de-  
 merferit, ultor Deus, sanctè affirmabat. Et enormi-  
 um quidem scelerum ream illam credidisses, cum  
 obruta lacrymis, & singultans procumbebat ad Sacer-  
 dorum pedes. Sed illa nunquam lethali crimine a-  
 misit haustam à sacro fonte diuinorum munerum v-  
 bertatem, & laboranquæ Confessarijs erat inuesti-  
 gantibus quid ad suum forum certò spectaret, nullum  
 enim ab illius ore verbum, excidit obstreperum,  
 criticum, nihil in eius moribus triste, nil austerum;  
 sed tota serena erat, & benigna, adeò ut negas-  
 ses Rosam esse, quæ spinis carebat. Cumque  
 integerrimo singulos amore complecteretur, à Dei  
 hominumque charitate animari videbatur. Nulla  
 rerum humanarum cura eius animum sollicitauit;  
 quin interrogata aliquando, num qua re præter diui-  
 nas delicias innocue caperetur, negauit se ullatenus  
 posse rebus perituris exhalari. At virgineum illius  
 candorem nulla vnquam veniali macula afflatum fuis-  
 se, nec in toto vitæ cursu ne semel quidem illi in ani-  
 mum cogitationem obrepisse, iurati asseruere vnde-  
 cim Religiosi viri, quotquot generalem Virginis con-  
 fessionem exceperunt. Postquàm egregiam formam  
 assiduis macerationibus, diuturna inedia, & aqua & c-  
 lida



lida toti corpori creberrimè superfusa, corruptit, magno haberi cœpit in pretio, utque innocentissimum, pœnitentiæ simulacrum, ab omnibus indigitari. At illa blandientis famæ laudes horrescens, viuidum illuc in genas colorem, vigorem in oculos, precibus revocavit; adeò, ut cum domum rediret sub meridiem sextæ feriæ sanctioris hebdomadæ, roseo vultu, instar Auroræ subiuvida, & amœna, congerrones quidam, iuvenes audacissimi in prætereuntem iocari sint, quasi reducem à conuiuio, & opiparè habitam. Illa verò quadraginta elapsos dies pane tantum, & aqua durauerat: & horas tunc triginta immota perstiterat in Templo S. Dominici precibus insitens, cibi que omnis expers, ac potus. Maius illi studium fuit premendi reliquas diuinas dotes, ideòque Deum à teneris annis flagitauerat, ne cui mortalium, sineret innotescere, quæ suum intra animum operari dignaretur, cumque illius votis annuerit Sponsus diuinus, perpauca, & penè vulgaria crediderim, quæ ut maxima, & singularia, spirituales Virginis Patres, ab illa expiscari poterant. Quid quod superos habuit ministros modestiæ suæ, & cum aliquando, templum ingressam, consternisset subita recordatio, destituti, in patenti cubiculo, seuerioris ad domandum corpusculum, instrumenti, designauit animo locum, in quo illud suppressi à Cœli Regina exoptabat, ut domesticos lateret, & regressa, reperit famularem suæ demissioni præstitam operam, à superum Imperatrice.

## CAPUT V.

*Beata ROSÆ mira Abſtinentia, prodigioſa ieiunia: Eadem, tenerum corpus, cilicis, flagris, catenis, domat.*

**L**Aboraret, opinor, hiftoriæ fides, prodigioſa B Roſæ ieiunia recensendo, niſi Lector admoneretur, compendium hoc, quo ſanctiſſimæ Virginis vita delineatur, à remiſſionali, vt dicunt, proceſſu fide bona extractum fuiſſe Beata Roſa profeſſo per D Catharinæ Senenſis veſtigia mirabiliter ad ſummum incendiæ culmen euasit. Penè infans omni ſibi fructuum eſu interdixit, qui ſuauiſſimi in Peruvia naſcuntur. Sexennis, tres hebdomadæ dies, niſ præter panem & aquam, deguſtare cœpit. Anno verò ætatis decimo, qui nto ſe obſtrinxit voto, nunquam delibandi carnē, niſi adigeretur illorum imperio, quibus non obtemperare, neſas fuiſſet; quod ſi aliquando fulminabatur, maximo ſtomachi ſupplicio, pœnas dabat virtutis eximix, & non rarò nauſcantem, ardentiffima febris inuaſit: quoties verò iam lecto deſixam delicatis edulijs ad ſalutem reuocare tentarunt, in manifeſtum vitæ diſcrimen adduxere; cum è conuerſo, panis fruſtulum aquæ inſuſum, præſentiſſimam illi ſanitatē ſæpenumero redonauerit. Quod prodigiū nulli admirationem incutiat, nam Chriſtus ipſam B. Roſam docuerat, velle ſe ab illa rigidis abſtinentiæ exercitijs, conſtanter honorari. At Mater, nimiam in exanguis filix vultu maciem conſpicata, hanc perſimoniam grande vocabat in crimen: Iuſſa proinde Beata Roſa

ta Rosa communi mensæ accumbere, ancillam rogavit, vt ex panis frustulo, & herbarum pugillo sibi pararet offam nullo sale conditam. Sed quas herbas sibi Virgo legebat, amarissimæ erant, & agresti saporis malignitate torquebant palatum. has illa è vicina sylva petitas alebat in horro studiosè, cuius sub sepibus vasculum abdiderat vervecino felle plenum, & hoc cibos aspergere, & os quotidie summo manè solita erat imbuere. Granadillæ, quo in flore mirabili perennant instrumenta cædis diuinæ, amarissimæ frondes dulcem illi, & quotidianū saporem elaborabant. Dubitari ergo meritò potest, duriusne illi à talibus cibis, an ab ipsa inedia tormentum esset. Duplici se torquebat ieiuniorum genere, & quo semel tantum in die tenuem panis, & aquæ refectionem delibabat, & quo per totum diem, noctemque penitus gustabat nihil. Primùm ferè quotidianum præsertim vltimis vitæ annis religiosius ab illa seruabatur septem continuos menses, à festo exaltatæ sanctæ Crucis ad vsque Dominicam Resurrectionis D. N. IESU Christi. Ac ineunte quadragesima omnem sibi subtrahebat panem, solis malorum aureorum seminibus parcissimè victitans, ijsque tantum quinque, dum sexta feria recurreret. Reliquo anni tempore, quod octo diebus absolvebat, vix vnica die tolerandæ vitæ sat esse credebatur. Vnico pane, illoque sat exiguo, & aquæ vasculo quinquaginta dies aliquando transiegit, aliæque vice idem spatium decurrit ne guttula quidem aquæ recreata. Supremis annis trans mittebat complures dies sine omni prorsus alimento. Feria quinta se includens



eludens in domestico Oratorio, nec inde ad Sabbathum vsque digressa protraherat triduum omninò infomnis, impransa, incanata, & vni angulo affixa omninò impos ab illo, vel ad momentum surgere. Quid quòd octo solidos dies nullum præter diuinam Eucharistiam alimentum admisit. Vulgare sit aquæ ipsius haustu gustum fraudasse, transactis hebdomadis quàmpluribus sine potu, & cæteroquæ hausta non aqua gelida, sed plerumque calenti. Prodigiosum est plus virium à ieiunijs accepisse, quàm à cibo, eò quòd cum sua Magistra Catharina vulnerati Christi lateris ambrosiam degustabat. Prodigio quoque simile est superfuisse in arido corpore locum, qui flagella exciperet, sanguinem qui verbera sequeretur. At nisi per Confessarios modus illi fuisset impositus, mortem nimum properasset ardor corporis castigandi. Postquàm sanctæ Catharinæ habitum induit non contrita vulgaribus funiculis, duas sibi catenas ferreas aptauit in flagrum, quibus per noctes singulas ita se crucentabat, vt sanguinis riuus parietes, & pauimentum aspergerent, præcipuè vt scelesti meliorem ad frugem reuocarentur, quot flagellorum sulcis, quot vibicuum liuoribus se in dies exarabat, ita vulnera dispensans per diuersas corporis partes, vt dum vna coalesceret, altera feriretur, iterumq; sæuieret in primam vix dum coalitam, ab hac alterna, crudaque vicissitudine dirissimè cruciata. Horrebant domestici ex ædium parte secreta plagarum strepitum audientes latè sonorum, quique B. Rosæ animum moderabatur temperari nimum rigorem iussit; sed illa infirmis ab eo precibus

extor-

extorsit, ut liceret sibi intra aliquot paucos dies quinque mille ictus infligere: terijs ab infantia præludijs ostenderat. quàm avidè in hæc pœnitentiæ exercitamenta ferretur, nam quadriennis sub crudorum literum, & grauis trunci pondere sæpè laborabat, & Marianam ancillam precibus adigebat, ut se in hortu angulo orantem, grauissimis ponderibus oneraret, sub quibus æstuabat, gemebat, & interdum victu premebatur ad solum. At, nondum quartumdecimum annum egressa, sæpè nocte concubia perambulabat hortum nudipes, oblongam crucem, liuidis humeris gestans, nec illi tunc auræ malignæ intemperies, non frigora, non ventorum turbines, insuaues erant. Iussa flagellis, non ferrea catena se cadere, ipsam catenam lumbis triplicato circumductu validissimè adstrinxit, & sera commissuræ angulis immissa, clauem eò proiecit, vnde redire non posset. Cum verò per extrictâ pellem in carnis, & nervorum profunda, ferrum penetrasset, jamq; conspultum propemodum esset, nocte quadam acutissimus coxendicium dolor, Beatâ Rosam inuasit, à quo, vires identidem accipiente, mox Virgo interempta fuisset; namq; catenam vi nulla aperire poterat, diù multumque frustra luctata; sed illa confugit ad preces, quæ Cœlum ipsum aperiunt. Et ecce sera, sponte dissilit, laxatur catena, diducitur; avulsione tamen opus fuit, quàm cutis, & cruor sequebatur. Vbi primùm vulnera conuerât, suo se iterum tormento B. Rosa incinxit. sed catenam carni rursus adnatam, sibi transmitti Confessarius imperauit. & illius aliquot circuli post B. Rosæ obitum, conseruati,

mira-

mirabilem spirarunt odorem, & omnibus peregrinū. Lacertis arctissima vincula circumdedit, quæ perpetim torquebāt musculos complicatos: pectus, axillas, latera, morsu creberrimo vexarunt minuti sentes, & vrticatum manipuli. At ciliciū nacta ex acutis equorum feris densè contextum, infra genua productum, crassitie serè implicabile, triumphauit sub illo rigoris paludamento, quod infixis vndique breuissimis acubus, in se violentius armauit. Hoc vsa complures annos, & ob frequentem sanguinis vomitum, alieno tandem imperio exuere coacta, saccum villis crassissimis grauem sibi in formam indusij aptauit, quo sub pondere æstuabat, rigebat, lassabatur extenuata viribus Virgo, & pœna illi erat quicunque motus, plumbea subucula prægrauatæ. Plantis, in quibus tantum à vertice capitis erat sanitas, quoties domi clibanus accendebatur, calcabat immota fornacis orificium, vnde vehementior incendij vis erumpebat. Huius delictis demulcebat corpus, cui sat pœnarum afferebat crebra ægritudo, exoptans etiam tentare maiora, nisi vetuissent animæ moderatores. Quid quòd neque delicias spiritus in corpus exundare sinebat, cauens, ac totis viribus obstans, ne diuinis epulis animum saginantibus reficeretur; quod ego diuortium sublimibus B Rosæ operibus adnumerandū reor. Hoc vnum solita erat reponere culpantibus nimium in se rigorem, sinerent ipsam, quando nil boni operaretur, saltem mala, tolerare.

## CAPVT VI.

*B. ROSA capiti aculeatam coronam infligit :  
eiusdem lectulus, cernical, nocturnæ vigilia.*

**S**pineæ sepes B. Rosam decebat, quæ dies, & noctes  
Shærens inplexili senticeto, quod Christi verti-  
cem insedit, ingressu pueritiæ ex ductili stanno sibi  
coronam implicuit, additis clauiculis introrsus præ-  
acutis, & hoc diademate sibi caput incinxit non sine  
vulnere. Plures annos durauit sub hoc spineto, quod  
tamen præludium solum fuit seuerioris tormenti, im-  
minentis ex secunda corona aculeis nonaginta no-  
uem armata. Hanc, postremos decem annos ad finem  
vsque vitæ prodigiosa constantia tolerauit, neque  
enim sine spinea corona D. Catharinæ Senensis ha-  
bitum induisse sibi videbatur. Argenteam laminam  
flexit in circulum, illique tres introrsus infixit acu-  
leorum ordines, tam firmiter suo quosque loco in hæ-  
rentes, vt Aurifaber, adhibitis forcipibus, euellere nul-  
lum potuerit. Dentatum hoc sertum, quàm dire mo-  
mordit velatum puellæ caput, præsertim cum spinæ  
non omnes simul, sed aliæ post alias successione mole-  
stissima cutem inuaderent, vtpotè ex varietate motu-  
um in singulis vulnerum angustijs obliquatæ. Sermo  
ipse, Virgini dolorificus erat: quid si tussi concucieba-  
tur pectus, si caput sternutamento exonerabatur? Sed  
hæc illi ludicra videbantur, ideoque vbi coronæ ex-  
trema coibant, vittas innexuit, quarum attractu dolo-  
rem indenderet, aculeos alius capiti infigens, neque  
vnuquam eodem quo pridie steterat, loco figebat dia-  
dem



demia suum, vt immitius pungeret, inque intacto pœ-  
nam renovaret. Sexta verò feria, se profundius saucia-  
bat, ad imum vsque sinciput, & auricularum cartilagi-  
nes, coronam demittens. Diù Matrem, ac domesticos  
latuit efferum hoc tormenti genus, & artes quibus il-  
lud in se B. Rosa atrociùs irritabat. Sed cum aliquan-  
do se blandè interposuisset Patri, quærenti ad virgas  
puerulum filium, fortuito errore in illius caput patris  
manus incurrit, ac tres illico sanguinis riuos explicuit,  
ex quo coniecit Mater, qualis Erinacens, sub candido  
eius velamine, nidularetur. Quoties tartareus hostis  
Virginem aggrediebatur, ter illa digito pulsabat coro-  
nam suam, quæ validiùs fronti impressa, certam ei  
victoriam asserebat. At, post B. Rosæ interitum, à san-  
cto viro suauata corona, prodigiosum in illo diuini  
amoris incendium repente accendit, & odore suauissi-  
mo eundem perfudit. Vt autem spinis ferrum, Sanctæ  
Catharinæ Senensis exemplar B. Rosa nostra secuta  
est, ita cum flores deessent, quibus de more virgi-  
neum demortuæ caput ornaretur, Catharinæ simu-  
lacrum suum illi diadema commodauit, in argumen-  
tum immortalis triumphi, quo excipi ab eadē Virgi-  
ne, & à pulcherrimo comitatu deduci ad solium di-  
uinitatis, manu præferens palmam, & à Deipara coro-  
na decorari visa est à nonnullis, probatissimæ sancti-  
tatis. Sed redeamus ad pœnas, quibus B. Rosa trium-  
phos sibi adornauit. Eam strati sui voluit esse duri-  
tiem, quæ somnum abigiret, non inuitaret, imò idem  
lectulus, & equuleus esset. Vix obrepserat matri so-  
por, cum Virgo remora culcitæ parte, cui incubue-

rat. in substratam tabullam descendebat. At capiti rude saxum supponere tam diu perstitit, quoadusque ab irata Matre, veniã extorsit suo sibi arbitrio lectum contabulandi. Truncus hic fuit vndique impolitus, ac lapilli sub vili stragulo dispositi, vt ea inæqualitate læderent corpus, cui leues tabulæ in delicijs fore timebantur. Postea verò tria ligna tortuosa, indolata, nodola, tabulis imposuit, ac tandem ligna omninò septem certis interuallis distinxit, ac tercentum præcutis regularum fragmentis inter capedines impleuit, quorum mucrones obuenterentur corpori, & in hoc prato, quiescebat B. Rosa. Ponè ad lectuli caput, amphoram appenderat felle plenam, quo antequàm ad somnum sese componeret, fauces recreabat in memoriam Sponsi, felle potati. Cervical primò fuit crassioris panni, volumen incommodum, crudus deinde later, mox lapis vndique scaber. At, à matre iussu puluinar adhibere, non illud lana sed ingenti vi segmentorum infarsit: Lanam ingeri Mater præcepit, obtemperauit B. Rosa; sed lanæ vim tantam stipauit, vt ligneum cervical videretur, & sub parte, à qua facies decumbentis excipienda erat, tortiles iuncos occluit. Quindecim ipsos annos, fugitiuum soporem, super horribile stratum, quòd vltimo loco delineauimus, B. Rosa carpsit, sensu doloris tam effero, vt ad illius cogitatum, cæteroqui generosissima tremere, æstuarer, certa non inde se absque omnium membrorum gelido stupore, ac veluti ex ossifragio surrecturam. Exanimem aliquando confirmauit Christus visibili, blandaq; specie, duriozem fuisse dicens Cal-

uariæ lectulum, in quo pro illa cœperat mortis somnum. Tandem qui prærant Virginis animæ, mitius illam ad soporem componi, pro imperio adegerunt, abiectis saltem fragmentis regularum. Vltimis vitæ annis plerumque in humili sella collecto corpusculo noctem transegit, ex nocturnis frigoribus tremens; ac rigens. Et hoc nouercae corporis odium, illam edocuit, ut nec vnquam vigil puluino insideret, sed vel stans perageret labores suos, vel palo pro sellula vteretur. Sed nec morti vicinam destituit hic ardor, durissimè cubandi. Equuleum suum frustra quæsiuit in nudo pauimento deponi, non impetrauit; at saltem lecticæ tabulis occipite, humerisque acclinis in duro ligno voluit qualitercunque commori Sponso Crucifixo. Nec defuerunt, qui in morientis pallido vultu notarint ipsam Christi in Cruce expirantis effigiem, quod aliàs, in Sancta Catharina Senensi, animaduertum fuit. Quantum verò vigiliis dabat, cui lectus ipse soporem adimebat! Horas illa duas, neq; semper integras, somno indulsit, reliquum tempus ita distribuens, ut ex diurno, nocturnoque, duodecim, quotidie horas orationi seponeret, alias impenderet fœmineis laboribus, quibus parentes alebat, cumque inedia, cilicij, lectiq; carduetum, calidæ potus, profunda meditatio diuinorum, vigilandi facilitatem ei comparassent; versutus tamen hostis illam reuocare nitebatur ad somnum. At B. Rosa, vel ceruicem illidebat parieti, vel sibi tundeat latera, vel prominentibus ex lignæ crucis brachiis fortibus clauis manus applicabat, & pendulum corpusculum librabat

in aere, vel oblongo, quem in cellula pariete clauum fixerat, modicum capillitium, residuum in fronte ad obtegendam spineam coronam, implectebat arctissimè, & pendula, vix summis aliquando pedum digitis terræ insistens, clauis in soporem pugnabat, de quo non satis adhibitis in lecto tribulis triumphauerat.

## CAPVT VII.

*B. Ros & domestica solitudo, fuga publici, cellula perangusta.*

**A** Prima infantia. solitarios angulos domi quærebat, procul à ludis puerilibus, vt vni vacaret Deo Crescente verò cum annis studio latendi, in horto sub vmbrosis platanis flexili ramorum, palmittum, ac virgultorum circumductu, modicum inclusit spatium, in quo ad humile altariolum, totas hærebat dies, adeo vt domi abiuerit in prouerbum, hortum adeas si B. Rosam quæris. At grandior impetravit à Matre aliud intra ædes cubiculum, in quo seorsim ab omnibus pernoctaret. Molestissimum illi erat in publico apparere. & nunc prece, nunc lacrymis ambiebat Matrem, vt optatissimam sibi solitudinem indulgeret. Aliquando ad obeunda vrbanaŕum salutarium officia euocata, iuxta domesticum furnum transiens, à cibani orificio saxum studiosè sibi attraxit, in pedem, vt eo vulnere claudicans, domi sineretur. Eo præcipuè nomine frequentiam oderat, quòd suavis odor virtutum suarum commendauerat illam apud omnes, velut illustis scæminam sanctitatis. Igitur aspirante Numine speculata est viam, qua se ab impedimen-



dimentis viriliter explicaret. Coronam precariam, ex corallijs, quam habebat in paupere thesauro, curavit Deiparæ Virginis collo circumdari, cui à Rosario nomen & cultus est, ut hoc vinculo suaviter captivata Regina sua, B. Rosa Matrem pertraheret. quò filia erat in votis. Post aliquot dies, visa est corona à Virginis collo soluta. pendere de manu parvuli læv, attento ad hæc Sacrista, qui profrebat, à nullo mortalium in digitos filii fuisse translatam. At B. Rosa tacita interpretæ divini consilij exultabat, intelligens, desponsam sibi à sua Diva, quam gratiam optabat, & suum pro Matre fide iubentem, sponsionis vinculum in se transiisse: ideoque voti secunda flagitavit à Matre cellulam perangustam, in qua sine permissu illius, qui suæ animæ præerat, nullius conspectum admitteret, aut alloquium: Intra paucos dies perfectum stetit arctissimum in horto tuguriolum, quinque pedes porrectum in longum quatuor in latum; ut ut angustum, sibi tamen, dicebat B. Rosa, sponsoque cœlesti sufficiens. Huic postquam sese inclusit, cuidam probatæ sanctitatis sceminæ in rapto visa est, sub specie lucidissimæ stellæ, cuius radios opaca parietum angustia conhibere non poterat. Hic perpetuos hærebat dies, per varia pietatis exercitia dispensans horas, ignara propemodum, in corpore ne degeret, an extra corpus. Cumque à nonnullis interrogaretur, cur non inde quotidie prodiret, ut Missæ sacrificio adesset, candidissimè respondit. domesticis curis distineri aliquando Matrem, sine qua domo prodire non poterat: fieri tamen à divino Sponso consultum, ut incerta re-

fidens complures quotidie missas videret, audiretque. Comptum deinde est, diuinitus Virgini datum fuisse, ut spiritu, non secus ac si corpore præsens adfuisset, interesset omnibus sacris, quotquot in vicinis templis, offerebantur. Prodigiosum porrò fuit obsequium à culicibus exhibitum solitariae B. Rosæ: Innumera illorum agmina soli humiditas, & arborum frequentia, aut gignebat, aut pertrahebat in Virginis cellam, amicum suo generi umbraculum, præcipuè ubi sub meridiem radij solis ardentes, aut sub vespærum serenæ noctis algores tenuissimis corpusculis imminebant: nec tamen in tot culicum legionibus, quibus scatebant undique parietes, personabat ostium, fenestra implebatur, vel vnicus fuit, qui B. Rosam vniquam attingeret, cum è contra Matrè, aliasq; religiosas sœminas ex permissu B. Rosam inuisentes, hostiliter invaderet, exercitus molestissimus. Nequè tantum hospitæ suæ parcebant, sed ad illius imperium in omnia sese flectebant obsequia culices ingeniosi. Vbi primum Virgo referabat Cellulæ portam: Eia, dicebat, amici, laudes celebremus omnipotentis Dei; at illi concentu lenissimo sparsi in gyros, arguta miscabant murmura, phalange tam ordinata, ac in se flexibus aptissimis redeunte, ut chorum credidisses, cui ratio dux præfideret. Cumque noctu repeterent hospitalem domum, rursus orantem B. Rosam gestiebat æmulari volatilis harmonia, & cum illa deinde, sub lege nocturni silentij, conticescere. Accidit aliquando, ut Catharina de Sancta Maria Terrij Ordinis Sancti Dominici, in Eremito domestica B. Rosam inuisceret:

hæc

hac à culicibus sauciata, vnum, quem sanguine turgidum vidit; occidit. At B. Rosa, miranti similis, cur hospites, inquit, meos trucas, nec tantillum animal tuo palcis sanguine, dum eius conditor suo nos toties recreauit? sed in posterum tecum illi, vt mecum pacem colent. Huic augurio fides stetit, namque illi, alijsque pepercit in posterum, culicem exercitus, adactus admirando, B. Rosæ imperio. Franciscam vero de Montoia Tertiariam iidem Sancti Dominici alumnam à tribus tamen culicibus appeti in Sanctissimæ Trinitatis honorem, blandè permisit. Vltimo vitæ suæ triennio in Gundisalui de la Massa Quastoris regij domo, pacem fermè solitudinem sibi Virgo statuit, iussa à parentibus obtemperare viro religiosissimo, qui suas ades Beata Rosæ hospitio ambiuerat consecrari: hic, totas cum diebus noctes in domestico latebat Oratorio, vel in vltimo ædium cubiculo, identidem regressa ad hortentem Eremum, perpetuo studio sequuta solitudinem, cuius amore tantoperè tenebatur, Magistra sua Catharina Senensis.

C A P V T V I I I.

*E. Rosæ cum Christo mira desponsatio, Pronuba Augustissima Imperatrice Angelorum.*

**D**idicerat quidem B. Rosa, Seraphicam Magistrâ suam Christo desponsam, sed vix audebat exoptare locum inter sponsæ comites adolescentulas. Interca tamen cædorem Angelicum, & profundissimam dehiscentis animi submissionem adornabat, eam scilicet

scilicet, sponsi diuini amores rapientem. Prodigijs ad Mysterium præparata, & ad consensum erecta tuit, modestissima Virgo, nam priuò, bicolor ille Papilio, de quo verba superius fecimus, aliquandiu per finistrum Virginis latus cum oberrasset, constitit è regione cordis, ibique depictam reliquit imaginem cordis, in vestæ B. Rosæ pulcherimè delineatam, perinde ac si; *Præbe mihi cor tuum*, Sponsus diuinus clamaret, & B. Rosam insigniret eodem emblemate permutati, cum illa cordis, vt olim cum S. Catharina. Nocte quadam speciosus forma præ filijs hominū, videndum se B. Rosæ præbuit, & candidissimum illius amorē, se quærere professus, innumeras Virgines spem dido amictu nobiles ostendit, quæ cadendis marmoribus distinebantur, ad iliarum consortium B. Rosam inuitans, inter sponfas suas, arduis virtutis operibus insudantes, adnumerandam. At B. Rosa, veste gemmis, auroque distincta, se repenti in larum se vidit, & ad cœlestem sortem elatam. Sed festinat hystoria ad manifestum munus, quo Christus vigilem B. Rosam ad connubialem thalamum inuitauit. Dies aderat consecrata triumpho diuini Regis Hierosolymam ingressi, cumque palmæ distribuerentur in Templo, sola B. Rosa, præterita fuit à Sacrista properante, siue id casu contigerit, siue Numinis consilio singulari, vt Virgo nouitate confusa timeret, ne obliquo forsitan animi motui, inscia succubisset. Ad Deiparæ sacellum confugit & genibus innixa, per vndantes lacrymas saucium cor suum effudit. Cum ecce Virginem videt sibi sereno, mitique vultu, adblandientem, mox

in X.



in Filium conuersam, & inde veluti fausto oraculo excepto, in se rursus intentam. B Rosa ignoto percussa gaudio. Puerum intueretur, qui pariter illi suauissimè aridebat, & postquam aliquamdiù miro sensu voluptatis, suam Spōtam perludit, in hæc apertè verba prorupit. *Rosa cordis mei, tu mihi sponsa esto.* At illa miram in modum exultans. ac in sui nihili abyssum dehiscens, ancillam se dixit, paratam sue Regis ad nutus. Et Virgo Mater: vide, inquit. ó Rosa, eximium fauorem, quo te filius meus dignatus est. Exinde quitur gratiæ thesauris tuam Sponsam ditauit Amor diuinus! Illa quidem sapienti viro, qui eius spiritus explorandi partes susceperat, pressius interrogata, dixit, verba sibi deesse, quibus munera liberalissimi Numinis, in se immeritam, collata explicaret. Vt autem perpetuò sibi versaretur ante oculos tantæ gratiæ monumentum, annulum poposcit à germano fratre suo, qui mysterij omnino insolens, perinde tamen ac si nuptiis interfuisset, eadem verba: *Rosa cordis mei, tu mihi sponsa esto*: annuli convexo iussit inscribi. Hoc B. Rosa sui amoris pignus in arca, in qua seruatur diuinum Corpus, feria quinta sanctioris hebdomadæ, à Sacrista claudi impetrauit. At Paschæ die, sponte, ac secretò rediit ad B. Rosam, non sine nouo prodigio; namque propè illam innixa Mater, & ad omnia intentissima. nihil animaduertit. Post Virginis obitum, vir sanctitatis fama conspicuus, manu tenens annulum B Rosæ, immortalem omnium rerum exilium raptus, & miro voluptatis diuinæ sensu colliquescens, B. Rosam rē sit

in excelso gloriæ fastigio inter præcipuos Cæli Ciues prope solum diuinitatis, ac diu loco moueri, & protendere rigentem manum non potuit. Quod si hæc in aliena manu prodigia peperit nuptialis annulus Beate Rosæ, quid ipsæ nuptiæ in anima Sponsæ præstitisse putes?

### C A P V T I X.

*Beata ROSA. perpetuo Orationis studio, miram  
assequitur, cum Deo unionem.*

**A**Dhuc infantem diuinus spiritus orare docuerat, eoque igne succenderat quem nec ipsa nocturna somnia conspirent. Audita ergo per noctem sæpissimè est numeratò reddere preces, quibus per diem inuigilauerat. Crescente verò cum ætate Religione, duodecimo anno iam vnitiua, quam dicunt, Orationis via Deo adhærebat. Porro duplex illi erat alloquendi Numinis ratio, tum enim soluto curis omnib9 animo, quietissimè se colligebat ad loquendum cum Deo: tum inter manuum labores, & extrema opificia, mentem nihilominus affigebat diuinitati. Priori, ut suprâ innuimus. duodecim quouis naturali die horas sepulserat; posterior illi perpetuus erat, nisi quando per horam horribilibus, ut mox dicemus, imaginib9 torquebatur; adeò, ut siue dormiret B. ROSA, siue uigilaret, dum neret, texeret, sericos acu pingeret flores, alios alloqueretur, comederet, legeret, in horto, in platea, vbique locorum, ac gentium. perpetuò obversaretur animæ oculis suis amor Deus. Quodque omnem admirationè supergreditur, diuina hæc præsentia

sentia ita B. Rosæ internas potentias occupabat, ut illam ab extremis sensibus non adeo detorqueret. Quocirca respondebat appositè ad omnia, prosequabatur institutum opus, ac domi satagens circa frequens ministerium, in remoto cordis thalamo, cum Sponso deliciabatur: At inter orandum, omnino torpebant illius sensus ad objecta, quæ ad se minimè pertinerent. Hinc in Templo defixis in aram oculis, nec prætercuntes videbat, imò nec si aliquid in pupillas incurreret, attrahebat nictu supercilia; sed veluti rupes, immobilis, quo loco, situque ad orandum se composuerat, eodem post horas, post diem integram, post solidum cum die binotium, inuariata perstabat. Vltimis verò vitæ annis, à manè feriæ quintæ ad Sabbatum usque, nonnunquam & ad Dominicam diem, in domestico Oratorio perseverabat, omnino impos de pavimento surgere. Tres præcipuè in singulos dies horas diuina beneficia recolebat: assueuerat etiam altissimo generi orandi, quo DEI attributa centum, quinquaginta mente peruoluens, singulis proprium latriæ cultum exhibebat: & hanc precationis formam terrori esse Dæmonibus asserebat, cui dum insisteret tota ipsa mouebatur systole cordis, atque diastole. Familiæ sermones, quibus alios alloquebatur, plerumque sagittæ erant, quibus ferebatur in DEVM: veluti hortum commendatura: Venustus est, dicebat, ac pulcher, DEVS illi flores adaugeat. Illam omnia inuitabant ad DEVM. & aliquando ægram, & viles cibos, quibus se reficeret, adornantem, canens auicula in extasim abripuit, mortalium omnium oblitam,

litam, ad vesperam usque; ab hora ante meridiem *ter-*  
*tia* diuino amore vehementius aestuantē. Quid quod  
 plantas ipsas, mutosque stipites ad laudem, & ado-  
 rationem Deo exhibendam B. Rosa mirabiliter in-  
 clinabat Rem affero inauilitam Summo manē cum  
 ad cellam suam reditura pandebat horti ianuam, emi-  
 nus conspectas arbores, virgulas, herbas, inuitabat,  
 ut secum benedicerent auctori suo. Et ecce moueri  
 subito ramos, collidi frondibus frondes, plaudere fo-  
 liorum susurros, flores ipsos, ac fructes animari in-  
 musici murmuris harmoniā: altissimas arbores sum-  
 mo cacumine verrere solum profundæ adorationis ri-  
 tu solemni. Neque hoc B. Rosæ prodigium peregrini-  
 um, ac rarum, sed frequentia diuturna, conspicuum.  
 Et cœli volucres allexit in alternam adorandi Numi-  
 nis societatem. Anno, qui B. Rosæ vltimus fuit, per  
 quadraginta solennis ieiunij dies, sole occiduo aduo-  
 labat prope illius cubiculum auis mirē vocalis; quam  
 Virgo cantu prouocabat ad laudes diuinas emodu-  
 landas. Illicō auicula inchoabat argutam harmoniā,  
 & sensum vocalior assurgens, cum Virgini cedebat vi-  
 cem, quæ voce tinnula, suauissimaque, & ingenio pro-  
 digiosè secundo hymnos institutos proquebatur,  
 perque integrū labentis horæ spatiū, alternabant cantū  
 ea lege, ut concinente B. Rosa, volucris attentissima  
 nec pipiret: vixque dato signo sextæ post meridiem  
 horæ perfuncta officio, auolabat, potitridie reditura.  
 Alios porro ad studium orationis accendere omni co-  
 natu sœgit, precipuè domesticos, & pios libros,  
 quotquot de hoc argumento, verba faciunt, & legebat  
 ipsa



ipsa auidissimè, & legendos alijs mira eloquentia persuadebat Religiosos verò viros, qui sacras confessiones excipiebant, ac Dei Verbi Præcones, obtestabatur enixè, vt ad orationem mentalem, omni suadela, & arte mortales inducerent, vt vñum piarum meditationum populariter inueherent, vt ad frequentandas Dei laudes, præcipuè Rotarium magnæ Virginis percurrendum, omnes inflamarent: & mirum quântum hoc, exemplum, & ardens hortatio B. Rosæ, diuinum cultum amplificaret.

## C A P P V T X.

*Desolatorijs Visionibus exercetur, ac horrendas alterius vitæ pœnas degustat. Doctorum examen subit, & ab illis mirum in modum probatur.*

**C**V M ad altissimum gradum, perpetuæ vnionis cum Deo, B. Rosa ascendisset; atrociora tenebrarum intervalla, pati cœpit in dies, quæ solâdis plerumque horis, eò miseram deprimebant, vt sæpe nesciret, in tartaronè esset, an in diro carcere ignis purgantis: adeò nulla suauissimi Numinis recordatio, nullum solatij vestigium aderat menti. Accedebat pœnarum in cumulum, memoria nebulosa præteriti amoris, quo Deo adhæserat aliquando, at nunc eundem nec nosse, nec diligere se posse arbitrabatur, imò veluti peregrinum, alienum, extraneum, vixque de fama notum eminens. & raptim suspiciebat: videbatur muro adamantino obstructum effugium, vt nusquam

nusquam pateret huius labyrinthi exitus; quare vix-  
erat, quo ab æterna pœna damni, suam in felicitatem,  
Virgo secerneret. Triste solatium venabatur à spe pro-  
ximi interitus, at tunc animæ immortalitas, importu-  
nè occurrebat, quæ illam æterno terrore, miserè laci-  
nabat. Per ipsos quindecim cōtinuos annos, quotidie  
semel, in hanc desolationis caliginem demergebatur  
integra vt minimum hora: iterum tabescebat in-  
malis, & Rosa, tota iam spinea semetipsam laucia-  
bat. Demum, ea fuit horribilium figurarum acerbis-  
tas, vt Virgo tamen ad quidvis ferendum impauida,  
vnicum hunc amarissimum calicem, à se transferri e-  
nixè petierit, nam durius illi erat, ab amore Domini  
desinere, quàm interire; cū enim quod corpori est  
anima, hoc sit amanti animæ DEVS, deerat illi quo-  
tidie, abeunte DEO, vita nobilior. Vix tandem re-  
perti Theologi, qui de hoc prodigioso mentis ango-  
re quidpiam certi præsumerent definire. Fuere, qui  
deliria, aut insomnia, qui lemurum spectra, vel dæ-  
monum præstigias, qui fumantis atræ bilis paroxis-  
mos interpretarentur. At illa, omnia modestissimè  
deuorabat, incusans inopiã ingenioli sui, quò imple-  
xos animi motus, explicare non posset. Nitebatur  
subinde similitudinibus adumbrare dolores suos; at  
si ignis nostri cruciatui conferrentur, ridendam esse  
comparationem dicebat. Se longè à Deo sitam in  
Regione dissimilitudinis, obrutam pusillanimitate  
spiritus, & tempestate, de qua loquitur David, Ana-  
thema sibi videri à Christo, veluti S. Paulus optabat:  
cum demum ab horridis illis imaginibus sibi dolo-  
rem in-

rem inferri, qui millies vitam, animamque sibi rapuisset; nisi prodigiosè à Deo cōseruata fuisset. Creditur sancta Catharina Senensi, aliquando idem perpeffa. De Beato certè Henrico Sufone id compertū, tradit historia. Sæpè illi erat ante oculos Christus, Iudex vultu asper, & horrendo tonitru intonans illud: *Ite maledicti*. At, compulsa aliquando fateri, num post tenebrosam ecclipsim, Sponsus illustraret animum suum? ingenuè fassa est, illico totam simul animam collucescere, & inflammari, & in sinum diuinitatis iterum volare; totam se transformari in Dilectum suum, immobiliter in Deo radicatā sibi videri, & illius gratia solidatam, adeo, vt certò sciret, quòd nihil vnquā se, à Christi charitate separaret. Quamuis autem arcanum gratiæ lumen, certitudinem illi indidisset, rectam semitam esse, per quam ibat, tamen modestissima Virgo non præsumpsit reculare serium, perque interualla repetitum examen vocationis, ac spiritus sui. Præter illos, qui Sacris illi erant à confessionibus, intimas eius animæ latebras peruestigarunt, alij sapientiā, & religionē singulares, tum è sacra Sancti Dominici familia, tum è Societ: I E S V, tum Doctor Ioannes de Castillo, sanctitate nobilis, Vir sæcularis. Ibi post diuturnam, & sæpius iteratam quæstionem, hæc præcipuè compererunt. A puerita, B. Rosam cœlestes stimulos, & tranquillum orandi spiritum concepisse, adeò, vt nihil illi dulcius esset, quàm loqui cum Deo, ac Diuinis inhiare. Ad duodecimum vsque annum ætatis, se vario inter orandum tenore, subinde cum imbecillitate corpusculi, cum

li. cum somno, & mentis euagationibus luctatam fu-  
 iſſe, plerûmque tamen animo libero, & quieto perre-  
 xiſſe in Deum, & ab illo tempore expertam, ita ſe di-  
 uinæ pulchritudini aſſigi, vt neque, ſi ipſe conaretur,  
 aliò mentem detorquere poſſet, neque phantaſ-  
 matum intercurſu, nec occupationibus ſenſuum ex-  
 ternarum, diuelli à complexu dulciſſimi Numinis:  
 radiare in animæ ſux penetralibus præſentiam propi-  
 tiæ diuinitatis, & hac deprehenſa, nulla ſe poſſe alia  
 re oblectari. Interrogata, num quos de myſtica The-  
 oria legiſſet libros? negauit inops Virgo, imò ne no-  
 men quidem. ſi quod proprium eſſet huius intuiti-  
 uæ orationis, ſibi innotuiſſe. Quæſitum ab illa eſt, quan-  
 to ſudore pugnauerit in prauas animi inclinationes;  
 at illa, vix ſe meminifſe talium certaminum, reſpon-  
 dit, & ab infantia, propenſione quadam innata, com-  
 plexam eſſe virtutem. Si quis autem indeliberatus  
 motus, nixus fuiſſet aſſurgere, repente ex apprehen-  
 ſione diuinæ præſentia, citra conſictum, euaniſſe.  
 Num quid ſolatiij caperet ex rebus creatis, quando a-  
 nimuin contemplantis labore feſſum nonnihil remit-  
 teret. Interrogata, negauit, ſe poſſe rebus perituris  
 exhilarari; & ſi ad momentam conſpectum perderet  
 amantis Dei, id ſibi videri atrocius quauis gehenna:  
 horrendas porrò imagines, pauoreſque, quibus illam  
 diximus agitatam, ſtatuerunt quæſitores fuiſſe expe-  
 rimenta pœnarum, quibus in purgatoriij carcere, tor-  
 quentur animæ. Quando verò nulla ſpes euadendi  
 illi aſſulgebat, quodam æternitatis fumo, & horro-  
 ris inferni caligine obtenebratam fuiſſe, ne virguncula  
 tam pro-



tàm prodigiosis ditata muneribus aliquando superbi-  
ret, utque illius amor hoc igne purgatus vehementius  
inclaresceret. At, adacta pro imperio aperire, quali-  
ter sibi post illas inferni tenebras esset, suffusa rubo-  
re, quem metus, ac pudor accenderat, dixit humili &  
intercisa voce: plerùmque post illas tenebras osten-  
di sibi humanitatem Christi, nunc virili, nunc infan-  
tili facie, sapius & Virginē Matrem, & hanc diutius  
obtutui suo indulgeri: hinc robustum gaudium su-  
per omne gaudium, hinc experimentum cognationis  
diuinæ, hinc vitam, & alacritatem omnium affectuū  
oriri. Deniq; post omnia sagacissimè explorata; hæc  
omnium quæditorum sententia fuit: Tutissimam esse  
viam, qua Virgo ambulabat, nullam hîc subesse va-  
serrimi Dæmonis imposturam. Aliqui Theologi  
præstantissimi auditis, quæ de Augustissimo Trinita-  
tis Mysterio, de hypostatica Verbi Diuini vnione,  
de libro vitæ, ac prædestinationis, de natura Gratia,  
alijsque Fidei secretis, arcana promebat B. Rosa, ne-  
que par acumen illius fœminæ ingenio, neque vllam  
mentem liberalius à Patre luminum illustratam se co-  
gnouisse professi sunt, & manifestè patuisse altio-  
rem spiritum, qui in Virgine loquebatur. Præcipuè verò  
cœpit omnes admiratio, quòd ab infantia ad gradum  
vnituum ascenderit absque eo, quòd purgatorium vix  
attigisset; quòdque in horrendo illo tenebrarum tor-  
mento, quasi certauerit cum Deo, tristiusne ille affli-  
geret, an illa vellet affligi; adeoque non solum fe-  
rendo fuerit, sed & quotidie triumphauerit. Sanè a-  
pud omnes quotquot Limæ tunc aderant, & aderant

multi consummata virtutis fama celebres, inualuerat constantissima opinio, B. Rosam spiritu Dei agere, & agi. & sapientia cœlitus infusa gubernari. Quædam sanctitatis nomine celebris Fœmina sicubi cum ea concurrisset, flexis humi genibus repugnantem excipiebat, & eodem corporis habitu ad eam litteras dabat, at ubi B. Rosa vestigium fixerat, gestiebat os & oculos applicare.

## CAPUT XI.

*Beata Rosa cum Christo, Desparâ, & S. Catharina Senensi familiariter, iucundè, assidue deliciatur, domestica tutelari Angeli consuetudine fruitur, variè luctatur cum Damone, semper victrix.*

**N**ON solum post internas animi nubes, Diuini solis manifestus vultus B. Rosam exhilarabat, sed aliàs quàm sepius videndum se præbebat amantissimæ Virgini: dum sacros Beata Rosa libros percurreret, paruus Amor vix digiti statura procerior, obambulabat paginis passu leuitimo. & interim sereno, suauique obrutu Sponsæ suæ blandiebatur: dum telas conficeret, laborantis pulvillo quietissimè insidebat, arridebat ridenti, breues protendebat vlnas, velut offerens amplexum; omniq; gestu, ac motu protestabatur amorem suum. Has verò delicias frequentes B. Rosæ obtigisse, imò serè quotidie argumento est, quod si ille tardabat, Sponsa querulis vocibus lamentabatur, utque amor Poësin docet, suas quere-

querelas familiari metro illigabat. Ex gutturis dolore, aliquando laborantem, Sponsus inuitavit ad ludū, & victrix B. Rosa suos mitigari dolores poposcit, & impetrauit. Divinus verò collusor, iacturam non ferens, ludum instauravit, & cum illi prosperè alea cessisset, & victoriæ præmium quæsiuit, augeri tolerantiam Beatæ Rosæ, ideòque primos illius dolores geminavit. Hoc dā blandè, modestèq; narrat Matri, ne illa ob suam ægrimoniam contabescat, visa est aliquamdiū vultu Angelico radiare. Alias cū in hortensi cella, nocte concubia viribus destituta, fomento indigeret, sui lateris ambrosiam delibandam, cordi Virginis Christus obtulit, vti quondam Catharinæ Senensi, cuius proinde Virginis, non alumna solū fuit, sed etiam Collactanea. In illustri Fœminæ domo, post sancta colloquia, de more secessit ad orandū, & septennis puella, iuxta B. Rosam vidit Puerum. IESVM multicolori amictu indutum, & radijs coruscantem. At in alijs ædibus Isabellæ Mexiæ, visus est divinus Infans, consertis cum illa manibus in porticu obambulans, miscere secreta colloquia, hæere in Sponsæ vultu, tanquam rerum omnium oblitus, & quacumque fixisset pedem, improvise lumine fulgebat pavementum. Quid quod mutui amoris adeò sollicitus erat Sponsus divinus, vt ne florem quidem in consortium venire pateretur. Invenit aliquādo Beata Rosa eradicatos flores, quos in horto studiosius alebat, & ob id dolenti Christus occurrit, ac dixit: An non ego flos campi, melior quouis Paradisi floreto? Flos es, ac flores amas! Mihi tuos amores in-

dulgs. Ego illos eradicaui, ac proieci. An non hæc fidem faciunt visioni fœminæ cuiusdam religiosissimæ, cui protestatus est Christus, à se B. Rosam gestari in penetralibus cordis, seque vicissim in eius virgineo pectore tranquillissimè habitare. At Cœli Regina, quàm frequenti altoquio, aspectuque B. Rosam dignaretur, vel ex hoc intelligi potest, ut paucis multa complectar, quòd cubiculariæ officia illi exhiberet, manè Virginem à somno excitando. Illam à multo tempore destituerat necessarius somnus, cui conciliando moderatores animæ præcepere vespertinum lactucæ, ac soporiferorum seminum usum; sed cum vix hæc inducerent quietem, dum instabat hora surgendi, cruciabatur B. Rosa, quòd ad præscriptam horam, evigilare non posset. Ergo Deiparam stellæ matutinam vocavit in vota, quæ cum immineret hora surgendi, aderat conspicua, & voce nectarea dormientem compellabat his vocibus: *Surge ad orationem, filia, surge nam instat hora.* Cum aliquando B. Rosa in lectulo consedisset, sed prægrauante somni pondere in cervical esset relapsa, redivit Augustissima Excitatrix, niueaque manu pulsavit dormientis latus, *Surge*, dicens, filiola, ne pigriteris. Alia vice B. Rosa abeuntē vidit à tergo Deiparam suspensis vestigijs, cuius alias materno vultu, solita erat impleri; illam cominus intuita, uti fassa est, deque facie ad faciem. Ex quo semel à Christo data illi fuit Magistra D. Catharina Senensis, mutua harum Virginum colloquia tam amica, crebra, fuerunt, ut veluti in Moyli vultum post diuinum consortium, se ex vultu

Catha-



Catharina, in B. Rosæ facie, lumina transuerint, quæ hanc illi per oris lineamenta propemodū assimilarint. Hinc apud omnes B. Rosa altera Catharina Senensis dicebatur, præcipuè ab obitu, cum illius facies inferetro videnda omnibus patuit. Cum tutelari Angelo, domestica illi necessitudo intercessit, illum legabat ad sponsum, si fortè hic, hora consuetæ, non adfuisset. Nocte quadam in Eremitio sua, sensit vires ex improviso languere, ideo rediit ad Matrem, quæ instantis deliquij signa notans in filiæ vultu, iussit ancillæ, adire subito vicinum propalam, & emere libum indicum, quod Chocolatam vocant. At B. Rosa rogauit Matrem, vt sumptui parceret, affirmans, sibi potionem illam non defuturam. Subirata Mater, Ancillam vrgebat ad opus. Sed Virgo, mox, inquit, aderit é Quæstoris domo, qui calentem deferet Indorum ambrosiam. Et quis hoc noctis Quæstorem admonuit de imminente deliquio tuo? addebat Mater, Cum ecce Quæstoris seruus, vas affert argenteum calenti Chocolata plenum. Attonita parens, obediætiæ vinculo filiam adegit, ediceret, vnde compererit, asfore sibi remedium. At illa subridens, sæpe me, inquit, huiusmodi dignatur officijs Angelus Tutelaris, illum misi, qui admoneret, Quæstoris vxorem, de medela, qua indegebam. Solebat Mater ante mediam noctis horam, aperire ostium horti, vt inde filia, se domum reciperet, At quondam oblita cum esset, B. Rosa per fenestram Cellulæ suæ vidit vmbra candidam motu decoro agilem, aspectuque non iniucundam, quæ Virginem, vt se domum versus sequeretur,

retur, inuitabat. Agnouit illa, sub vmbra latentem Angelum suæ Custodiæ destinatum, cumque illo, se dedit in viam; vt ad horti ianuam peruenere, hæc, ad vmbrae tactum, sponte patuit, Sed & aliorum Tutelares Angelos, sibi ad nutum habuit obsequentes. Exemplo sit, vir quidã è religiosa familia, qui peregrè profecturus B Rosæ preces flagitauit, pro itineris periculis diuertendis; At cum diu iter tutissimum habuisset, in Truxilli conualibus, grauiaqueque perpesus est, ac deinde Limà regressus cum B. Rosa conqueri cœpit, quod se destituisset: Virgo id accidisse dixit, quia non ille tunc fuerat peregrinus, qui esse solebat, & hominem admonuit de arcanis ei solummodo notis, quæ non nisi Angelo internuntio B. Rosæ, potuerant innotuisse. At quantum illã Sanctissimi Angeli amabāt tantū demoderant furia tartareæ, quæ aliquandò palam cum generosa Puella certarunt. Ingentis molossi forma, semel in horti cella. per tenebras aggressus est B. Rosam malignus Tenebrio; percontauit irritò morſu virgineum corpusculum, quamque discerpere non poterat, diu raptauit per solum, quousque B Rosa his vocibus: *Ne tradas bestiis animas confitentes tibi*, hostem egit in fugam. Fuit, cū ex insilijs adrepens Cacodæmon, improuisum ei colaphum incussit. Cū saxum in eam libravit eo consensu, vt euntem, ad humum afflixerit: Cum in secreta ædium parte, orans Beata Rosa, vidit in prægrandi Sporta teterrimam beluam licentiùs tumultuari, ac dedignata, qualicumque solatio lucis vti, candelam extinxit, & hostem in arenam provocavit. At ille

Gigan-

Gigantea mole proficiens per humeros eorripuit Vir-  
ginem, strinxit, contorsit, quasi laceraturus oblectan-  
tem : & omnia quidem puellæ ossa commolita vide-  
bantur, nervique distracti, at, infractus animus, risit  
furentem Cyclopi insaniam. . Animadvertum est,  
frequentes hos Virgini fuisse agones, nec vnquam  
formidinis ab illa sensum expressisse, quando, feroci  
vultu, animorum prado irruebat. Sed aliquando cum  
in horto specie formosissima ac penè mutatus in An-  
gelum lucis illi adstitisset, & procum ageret, à nobili  
fuga victoriam quæsiuit illicò Beata Rosa, & in pro-  
pinqua porticu ferrea catena correpta, nudos sibi hu-  
meros flagris acerbissimis cruentavit, interque san-  
guinis & lachrymarum rivos, de Sponso conqueri  
cœpit, quòd se tunc delituisse. At ille, manifesta  
luce conspicuus B. Rosæ vultum exhilaravit, ac di-  
xit : Ni tecum ego fuisssem, tu ne victoriam repor-  
tasses ? Germana planè sunt hæc ijs, quæ S. Cathari-  
næ Senensi in certamine simili contigerunt, cui Vir-  
gini collata munera Sponsus, in B. Rosam quoq; con-  
gessit: velut etiam mirabile donum internoscendi  
hinceras visiones ab illusionibus Sathanæ, quo floru-  
it à pueritia, ac tunc temporis eruditè recensuit re-  
gulas distinguendorum spirituum ab effectibus, quos  
in anima patiunt: Has olim Christus Catharinam  
docuit, hæc, B. Rosam, quæ suam adeò Magistram  
expressit, vt si ad Indos accidisset fama erroris Pytha-  
goræi de transmigratione spirituum, quàm plurimi  
credidissent, Catharinæ animum, in B. Rosæ corpus  
ingressum. .

## CAPVT. XII.

*Beata Rosa &, persecutionibus, morbis, ærumnis  
preſſæ, prodigioſa tolerantia.*

**R**OSIS connaſcuntur ſpinæ. Nonum ætatis menſem attingerat, cum lactanti matri aruerunt vbera, reque anguſta domi prohibente conductam nutricem, liquidiori pulcæ ſupplebatur lactis inopia, diducto paruulæ ore non ſine cruciatu, ſed ſine lacrymis, quin imò B. Roſa ſui pollicis inutili ſactu, tacita fraudabat ſatnem. Vix pedibus ingredi cœpit, cum ob muliebrem Auia Matrisque, de Iſabellæ, Roſæque nomine controuerſiam, vtriuſque perſecutionibus ſe vidit implicitam, excepta virgis ab auia, ſi ad Roſæ nomen, à Matre, ſi ad Iſabellæ, reſpondiſſet. Vt ſuauiſ erat indoles ſiliolæ, ſic aſpera conditio Matris, quæ B. Roſam ob eximiam modèſtiam, perpetuas preces, ac ſæculi fugam, non conuitijs ſolùm, alapis, pugnis, & calcibus, ſed & nodoso baculo ex malo cydonio delumbabat, præſertim poſt grande crimen præciſi capillitij. Nec mitiores in eam domeſtici, ob continuum commercium diuinorum, & ſerè nullum alimentum, quo patebat, humanis viribus eam viuere non poſſe, vocabant B. Roſam, in ſuſpicionem fictæ ſanctitatis, eique minabantur breui rapiendam ad ſacrorum Quæſitorum tribunal. Exultabat interim B. Roſa videns per ipſas Catharinę vias ire ſe ad Sponſi vnionem, & ab illuſtri ſcœmina interrogata, cur à Seraphica Magiſtra ſua non quærebat ab his ærumnis eſſugium, ( namque apud omnes in comperto erat. B. Roſam,



Rosam, quacumque veller, à Catharina impetraturam: pluris se facere dixit, suæ Matris dolorosa stigmata, quàm delicata solatia, eò quòd puderet Crucifixi sponsam, vel per momentum, cruce viduari. Et hæc quidem prægrandis nunquam, aut raro illi deerat; namque vacantem ab externa, grauior occupabat interna. cessantique foris persecutioni, agminatim corporis ægritudines succedebant. Ex dira neruorum attractione triennium lecto decubuit, cruciatu immenso, gemitu nullo. Mirum quot ex diuersis, oppositifque causis in Virginem morbi irruerent, terni, simul, & quaterni, nullo supposito in exsucco, arridoque corpusculo ardoris pabulo. At non ab intemperie humorum, sed à beneuola Sponsi manu, vt ipsa probè sentiebat, hisce agonalibus bonis prouenientibus. Sanè confessa est aliquando, putare se, nullum alicuius partis, aut membri superesse cruciatum, quem ipsa non senserit. At ne primus quidem impatientie motus vnquam obrepfit, qui affixam diuino beneplacito, vel latum vnguem detorqueret. Cum angina, cum asthmate, cum ischiade, cum pleuritide certandum, illi sæpissimè fuit. Stomachi, pericardij, intestinorū dolores, frequētes conuulsiones inuehebant, febres, easque contumaces assuetudo verterat in iocum, non item articulares manuum, pedumque fidiculas, podagram, chiragram, arthritidem domesticam præcipuè familiam epulorum, quæ impransam, & incœnatam B. Rosam frequentissimè insederunt. Illa inter extremos dolorum laniatus, benè sibi esse perpetuò dicebat, & Sponsum tantummodò alloquebatur his vo-

cibus: Domine, auge, auge dolorem, dummodò augeas & amorem. Quàm verò suæ B. Rosæ precibus obsequeretur Sponsus diuinus, ostendit mirabili, celeberrimæque visione, qua supra geminos arcus lucis immensæ Christum librantem aurea lance hominum tolerantiam. suæque munera illis collata in præmium, aspexit. eundemque suum regem audiuit elata voce commendantem poenas constanter ab hominibus devoratas: & asserentem non alia, quàm crucis scala ad Cælum eniti homines posse. Tunc validissimus impetus B. Rosam invasit profiliendi in forum, & ærumnarum pretium celebrandi, diuinæque gratiæ, cuius mirabilem puerititudinē, & vim, qua constituie animas deiformes, apertè viderat. Hoc præparavit B. Rosam ad ultimos paralyfis dolores, qui, præmaturam ei mortem intulerunt.

## C A P V T XIII.

*B. Rosæ ardentissimus erga Sponsum amor, varijs indicijs manifestus: impetratum ab illa miraculum sudantis imaginis, ut Christum omnibus amandum persuadeat.*

**Q**Vanta in huius Virginis corde flagraret Aethna diuini amoris, palam aliquando fecerunt splendores, & flammæ ab orantis vultu scintillantes. Visa non rarò est euibrare per os, oculosque lucidissimū ignem præcipue dum funderet preces. Eiusdem ardoris indices erant, ignita suspiria, quibus perpetuò diuinum cordis est im ventilabat. Ardentes perpetuò precatiunculas iaculabatur in Cælum, quas operæ præ-

tium esset hic apponere, namque plurimis vsu fuere non sine maximo diuini amoris incremento. Omnia B. Rosę colloquia, salutationes, responsa, amoris diuini mentione, condiebantur. Vnicum illi solatium erat, de amore diuino aut audire, aut loqui, omne aliud argumentum, cum, dexteritate huc inflectere. Tunc Virgini, alias taciturnę, preesto erat facundia mirabilis: fulgurabant oculi, & ex cordis abundantia loqui linguam manifestum erat. At cum in priuato Oratorio soluebatur in preces, gratissimum erat audire inuitantem singulos ordines creatarum rerum ad amorem diuini Conditoris. Duabus, ac tribus horis eidem insistebat, & clam audiebatur à multis, qui viderunt arripientem non raro pendulam, è pariete citharam, tactuque chordarum temperantem impetum vocis, & excepta sunt hæc verba ab illa numeris illigata.

*En inter flores pulchrescū, & inter Olivas.*

*Iesule, nec molli spernis adesse Rosę.*

Namque Matre Oliua, & Patre de Floribus, nata erat. Vehementissimi amoris comes, ac testis zelus, virginem adurebat, ideòque otiosos in templo fabulantes admonebat officij: Non erant domi, qui coram illa quidquam ineptum proferēt, veriti fulmina Virginis, diuinas iniurias nō tolerantis. A prima pueritia si forte audivisset sorores amatorium quid concinentes, vherrimo fletu testabatur, dolorem cordis exulcerati. Lachrymas, quia vnicè ad ærarium DEI pertinere dederat, (namque illis emitur Cælum) nolebat aliò, à quocumq; profundi, ideòq; cum fortè vidisset Ma-

item

trem plorantem: Quid, inquit, prodigis gazam Nu-  
 minis thesauro referendam? Quotiescunque vero  
 suum Deum ab alijs, coli animadverteret, triumphaba-  
 bat immenso gaudio, & aliquando cum reddiisset ad  
 cor, sœmina è sacro Cœnobio profuga, B. Rosa miris  
 læticijs incessit, festumque diem egit, perinde ac si  
 totius Americæ sceptrum, ad illam deuolutû fuisset:  
 D e v s que, vt B. Rosæ gaudium intenderet, ostendit  
 Sanctitatem insignem, quam adeptura olim erat pœ-  
 nitens Sanctimonialis. Habiturus aliquando erat so-  
 lemnem concionem Confessarius B. Rosæ, quem re-  
 pentè febris invasit. Rescivit id Virgo, & precibus  
 contra se inuitavit Concionatoris febrim, futuriq̃ue  
 euentus certa, virum admonuit, præstò illi fore vires,  
 se verò coquendam febri, non sua. Quod re ipsa  
 contigit B. Rosæ, vt olim Sanctæ Catharinæ Senensi.  
 Propagandæ gloriæ diuinæ studio innumera excogi-  
 tabat in dies, quæ hominum pietatem accenderent:  
 velut inter cætera nouam artem conficiendi vestes  
 infanti Deo, offerens pro indusio, falcia, stragulo, fim-  
 brijs, crepundijs preces, ieiunia; verbera innu-  
 mera. Quod nobile inuentum, quàm plurimi ample-  
 xi sunt. Hanc autem sui amoris amplificandi solli-  
 citudinem ingenti miraculo probauit D e v s. Anno  
 huius sæculi decimosextimo, decimaquinta Aprilis  
 die, cadente Sole, Rosa cum vxore, & filiabus Gun-  
 disalvi Quæstoris, effusa in preces ante pulcherrimâ  
 Seruatoris imaginem, vehementiùs amoris stimulis  
 concuti cœpit, jamq̃ue nec voci temperare posse, sed  
 erecta in pedes seruidissimè affari suum Deum, cumq̃;  
 obte-



obtestari, vt ignita pharetra excussa mortales omnes  
sui amoris telis vitalibus, vulneraret: Cum ecce puella  
Quæstoris filia, videt Seruatoris vultum, sudore ma-  
didum, in argumentum amoris; quo flagrabat a-  
mantissimus *Deus*, quemque in *Beata Rosa* gra-  
tiam indicijs illis profitebatur, vt pares in ho-  
minum cordibus, flammæ accenderet. Mox  
puelle mater, tum genitor, deinde Religiosi vi-  
ri, tandem Angelinus Medorus, qui sacram effigiem  
colorauerat, alijque plurimi viderunt copiosas sudo-  
ris guttulas, ad instar minutissimorum vnionum, tota  
sacratissimæ imaginis facie conspicuas lucere, ac pro-  
minere. Subnasci alijs alias, mutuoque attritu solui  
in fluxum, ac diuersis lineis per capillos, & collum  
decurrere, quoq; detergebantur magis, eó magis  
erumpere, riuosque riuus succedere: & hoc ostensum  
supra quatuor horas produci, nullo colorum, aut ve-  
nustatis detrimento, imò adaucta interim pulchritu-  
dine vultus diuini: Chrysellini humoris claritas, o-  
dor nullus, & alia quàmplurima examina, palam fe-  
cere. non inesse humori pinguedinem aliquam ex  
coloribus oleo temperatis, sed omnes naturæ, atque  
artis industrias à tali prodigio longé abesse. Prosceni-  
um illud amoris diuini reciprocos hominum amo-  
res inuitantis *B. Rosa* vota impleuit; namque omnes,  
qui spectaculo interfuere, nouis, acutis, insolitis diui-  
ni amoris stimulis, sub illius intuitu, vulnerati sunt Ne-  
que hic stetit miraculum, sed alterius partu suam cer-  
titudinem asseruit; namque *B. Rosa* ipsa lapsu fortui-  
to ad terram allisa grauiter offenderat, adeo vt Chi-  
rurgi

rurgi metuerint, aut mancam Virginem ea parte fore, aut curationis remedium diuturnum, incertumque. Rosa certa recuperandæ salutis, si gossipium diuino su tore madidum, brachio admoueretur, tamen cupida fruendi diutius doloribus suis, id non est ausa, nisi ex Confessar. j præscripto. Tunc verò tractu præuulido sentit redire ad suam sedem distortos neruos; detumescere pulpos, distringi musculos: attonitis ad hæc Chirurgis, quide intractabili brachio, & in omnem medelam contumaci, iam propè desperauerant. Præter illa, quæ inuimus, B Rosæ prodigia, imperium in belluas, arboreisque, & in spiritus ipsos, inuicem cordium, & absentium rerum, manifesta alloquia præsentis Dei, prædixit breui, aliorum vberissima appendix, statim atque licuerit ex lege sacrorum Rituum.

#### C A P V T XIV.

*B. ROSÆ cum imagine Deiparæ familiare consortium: in diuina Crucis signum Religio;  
Mutui honores, quibus illa & S Catharina Senensis se prosequuntur.*

**A**Nte centum, & amplius annos, imago Deiparæ Virginis, cui à Rosario nomen est, Limæ cultum accepit: Ex illo Roseto, ver nascentis fidei, in eas terras sese latè diffudit. Ad huius aram B Rosa perpetuo procumbebat in preces, mira lætitia gestiens, & suam Diuam loquentem, varia serenæ frontis eradiatione, veluti quibuldam nutibus, tam perspicuè percipie-

cipiebat, ut nulla verborum facundia melius præstare id posset. In filioli quoque diuini vultu, velut animato libro responsa distincte legebat, veluti si picta cerneret, vel mutis characteribus, exarata. Hunc deperibat: huius ad intuitum nouo calore pertundebatur, & gaudio, videbatur enim cœlestis intans brachia foras protendere, veluti in amplexum B. Rosæ procururus. Fama erat illam omnia impetrare, quæcumque ante sacram imaginem à Cœli Regina flagitaret, ac tanta securitate rerum euentus pollicebatur, quasi concessæ gratiæ diploma percepisset. Colebatur in domestico Oratorio altera Dei parentis imago, in qua B. Rosa videbat omnia spirare, ac vivere, & aliquando, cum pia matrona, ante illam narraret prodigia, quibus Virgo in Atocha clientes suos à vitæ discriminibus eripuerat, B. Rosa prospexit imaginem edentem signa inusitatæ lætitiæ, torquentem oculos benignissimo nutu, augustiùs radiantem. Porro sacellum Rosarij, quouis die Sabathi, floribus exornare consueta, quos in horto educabat, nunquam hoc solatio destituta fuit, quàmuis perfrigida rigeret, aut ardens esset anni tempestas. Sed pulchriùs inducbat, spiritali veste Reginam suam, & alia ornamenta, ieiunijs, inflictis sibi verberibus, & precibus innumeris componens. Præaltam crucem in hortensi sua cella extantem, pijs complexibus perpetuò stringebat: vbicumque diuinum hoc signum incurrisset in illius oculos, pulsu validissimo sua præcordia agitabat, siue in fortuita trabium commissura, siue in decussatis tepium bacillis, in vestibus, in ipsis demum

demum festucis, ac paleis occurisset; illam sine  
 attentâ veneratione nunquam præteribat.  
 Libanotim, vulgò Rorem marinum, alebat in hor-  
 to, cuius tres arbusculæ in crucis formam coibant;  
 vnam ex his Proregina dono quæsiuit, sed apud illam  
 cespes illico exaruit, & idcirco B. Rosæ manibus  
 iterum insitus, post quatuor dies pulchrior solito re-  
 uiruit. Circumferre, Sanctæ Catharinæ Senesis ima-  
 ginem quotannis solebat pium Sodalitium illius  
 cultui consecratum. Cuius Diuæ statuæ coronis,  
 floribus, & multo fulgore gemmarum adornandæ  
 B. Rosa quoad vixit, destinata fuit, quo munere tem-  
 perare sibi à lachrymis, ab osculis, ab alloquijs præ-  
 ardore non poterat: Oh si præsto mihi esset pecuniæ  
 vis non exigua, dixit aliquando, vt pulchriori amictu  
 te induerem optima Mater: & ecce illico adfuit, quæ  
 ab illustri scæmina nummos attulit, B. Rosæ votis  
 designatos. Visus non rarò fuit sacræ imaginis vultus,  
 insolito splendore radiare. Floruerunt ad imperium  
 B. Rosæ caryophylli, quorum pridie ne nodi quidem  
 apparuerant in florem erupturi: Ac tres vernarunt,  
 quot sibi B. Rosa iusserat afferri. Francisca de Mon-  
 toia, quæ sacrum Catharinæ simulachrum exornaue-  
 rat, B. Rosæ beneficio incolumis euasit ab igne sul-  
 phurato, qui in oculum ipsius incurrerat, & resili-  
 ens incendit vestes alterius scæminæ quam corripuit.  
 Ipsiufinet B. Rosæ dexteram, aliquando horrenda ar-  
 thritis inuaserat, adeò, vt intumuerit manus mirum  
 in modum, nec digiti loco moueri possent. vt verò  
 Seraphicæ Matri suæ festiuium habitum solito cultu  
 compo



componeret, digitos forficum ansulis immisit, cum id fieri præ tumore non posset, & alacritate miræ gemmas, torques, monilia in ordinem distribuit; attonitis ad hæc regio Quæstore, illius coniuge, & medicis, qui diuinitus id contigisse professi sunt.

C A P V T XV.

*B. Rosa feruidus amor, & cultus in diuinam Eucharistiam pro qua ad Martyrium se accingit.*

**T**ER, vt minimum, in hebdomada diuina Eucharistia reficiebatur, quinquies non rarò, & aliquando in singulos dies: præmittebat semper magno gemituum, & lacrymarum apparatu, sacramentalem confessionem: pridie asperius cruentabat corpusculum flagellis, rigidoque ieiunio, & hospiti diuino, tam pretiosis ignitarum aspirationum odoribus, cordis habitaculum adornabat, vt si per totum vitæ spatium, illa tantum vice, exceptura esset amantem Deum. At dum procumbebat ad Angelorum mensam, adeò diuini amoris igne flagrabat, vt facie præferret cordis incendium; hæc enim corusebat adeo, vt Sacerdotibus terrorem incuteret: Cœlesti splendore sæpissimè perfusa, Angelica non rarò forma, radios etiam emittens, apparuit religiosis viris: & ipsa Virgo, à Confessarijs iussa indicare mirabiles effectus, quos in animo suo, diuinum hoc Sacramentum pariebat, in singulis verbis hæsitabat, causata vocabulorum inopiam; tamen, immigrare se quodammodo di-

do, dicebat, in suum Deum, & gaudio tam immenso recreari, ut profectò nulla iucunditas mortalis, vitæ comparari posset illi, quæ mammilla Regum, pretiosum hoc conuiuium suum secum quodammodo diuinitatem partiebatur. Accedebat robur, & saturitas prodigiosa, adeò ut, cum sæpe dum templum adiret ex pridianis ieiunijs, flagris, ac vigilijs fessa, in angiporis hæere cogeretur, diuino resecta pabulo, domum rediret alacri passu: præiret Matrem, veluti si ambulandum sibi esset ad montem Oreb in fortitudine cibi illius. ut vero corporis saturitatem à pastu eucharistico acceperit, patuit domesticis; namq; reuersa domum ab epulo diuino, rectà festinabat ad secretum eubieuli, & ibi ad seram vsque noctem inclusa, perstabat in sponsi complexibus, & rogata cibum sumere pridiano exhausta ieiunio, respondebat: præ ingenti satietate mensa Domini, alium se cibum admittere neutiquam posse, & aliquando per octo solidos dies, altaris Sacramento pasta ab omni prorsus corporali alimonia, veluti Sancta Catharina Senensis, abstiuit. Tanta verò religione venerabatur hoc Sacramentum, tam ardentem amabat, ut quotiescumque illo recreanda erat, missæq; sacrificijs interesset omnibus, à summo manè ad meridiem vsque, ne vel ad momentum quidem, oculos ab ara deflectens, aut supercilia vnico nictu demittens, licet noti, ignotique ante illam transirent, & ferè in oculos incurrerent. Cum publica quadraginta horarum supplicatione adorabatur Sacramentum à populo, à mane ad vespemam vsque immota prorsus hærebat innixa genibus B.

Rosa

Rosa oblita prandij, nec aquæ vna gutta refecta: sic per octo solemnes dies Sacratissimi Christi Corpori consecratos, sic vltimis quatuor annis, vbi seria quinta maioris hebdomadæ deduxerat ad monumentum Regem suum donec die parasceues ad tabernaculum transferretur, nec noctu inde cedeat, affixa tumulo, toto viginti quatuor horarum decursu, nec sedere coram illo ausa, nec muro tantisper acclinari. Sicubi audisset ad diuinum Corpus adorandum signa dari, cor, & caro illius exultabant in Deum viuum, vividior in facie color accendebatur. Iucundissimum illi erat suis manibus aptare lintea, pallas, & quidquid textile ad sacram Altaris supellectilem spectat. Pretiosos è filis sericis flores effingere, & in hæc opera conficienda, ne diurni laboris penso, egestatem Matris fraudaret, noctis partem seponere. Denique pro Sanctissimæ Eucharistiæ mysterio, vitam effundere prægestijt. Cum Batauorum classis, Peruuia littora popularetur, & ipsi iam Limensi portui immineret, imò etiam in arenam profilijsse milites dicerentur, B Rosa cæteris exanimatis, mirum in modum exultans, in templo socias hortari cœpit, ad subeundum pro religione martyrium, & facie rutilante, vestem, quâ longior in terram defluebat, alacriter præcidit, cothurnos exuit, vt in breui hac veste magis expedita, incurreret in hostes. Ex oculorum scintillis, ex impauidi vultus constantia, ex viuido tono vocis heroicæ, animosa virago lænam induisse videbatur, lacerans horam fatalem, & morti minitans pugnacissimè: Feruebat Virgini sanguis effundi audius: cum

auditum est, receptui Batauos cecinisse; & voto suo fraudata B. Rosa torqueri cœpit ardentiori siti martyrij, cuius amore saucia, dolebat, se nq̃ illis remporibus natam, quibus gliscebat tyrannorum furor in Christianos, & sapè cum gemitu dicebat familiari Matronæ: Utinam idonea ratio, & modus occurreret, adornandi fugam, ad barbarorum Prouincias, & ibi sanguinem pro Christo fundendi.

## C A P V T XVI.

*B. Rosa æ, eximius pro periclitantium animarum salute zelus, & studium consulendi corporali saluti proximorum supra modulum facultatum.*

QVoties ad interiora meridionalis America montana flectebat oculos, cruciabatur medullitus, illacrymans perditioni tot Barbarorum: & cæteræ gentes Christianis legibus non exultæ perpetua illi erant materia lacrymarum: Optabat visceratim, discerpi ac retis instar obpandi voragini, qua tot animæ inielices ruebant ad Tartara: hortabatur Religiosos viros ardentissimis verbis, vt ad nunciandum Barbaris Euangelium festinarent. non hærendum, in tonabat, in subtilitatum apicibus, in controuersijs verborum: proijci scholasticos labores, clamorosasque disputationes, si tantis parta sudoribus eruditio, proximorum saluti fideique propagationi non impendantur. Assueverabat, se nisi sceminam natura finxisset, decurso studio literarum, adituram fuisse ferocis-



simas gentes, quas vel in viam salutis reduceret, vel ab illis coronam acciperet mortis obitæ pro fide sanctissima: statuerat adoptare sibi populum inopem, & desolatum, quem in studio virtutis, & literarum educaret ad laborem in conuersione gentium subeundum. Vni ex Confessarijs suis inchoato, an expeditionem ad Barbaros susciperet, obulit diuadium operum suorum, quibus Diuinitatis amorem demerebatur, vt alacrior ille ad excolendam vineam Domini festinaret. Quæ verò illi cura fuit, & zelus periclitantium Christianorum, pro his quotidie cruenta sibi verbera infligebat, dicens, si quo modo sibi licuisset fungi prædicatoris officio, opertam horrido cilicio, nudipedem, squallidam interdum noctuque se circumlaturam Crucifixi Seruatoris imaginem per fora, per trinia, & lugubri clamore reuocaturam ad cor homines à recta via decerrantes; at diuini verbi conuersionatores feruida modestia admonere officij, vt facundia inani, & inutilibus floribus, ac theatricæ ostentationis cothurno posthabito, animaduverterent, constitutos sese hominum piscatores, qui flagitiosas animas eximerent ab ima Charybdi vitiorum. Et exemit ipsa B. Rosæ nonnullas prodigiote. Iuuenem præcipuè genere, quam moribus nobiliorem, qui amore pulcherimæ B. Rosæ succensus, ac desperata ipse nuptiarum, quærebat saltem occasionem, qua oculos pasceret illius venustate, ideoque B. Rosæ Matrem conuenerat, vt iuberet à filia collaria sibi aliqua, ex prætioso carbaso elaborari. Aduocata B. Rosæ, vt statueret, quot vlnæ melioris telæ, & vndenam es-

sent emendæ, diuinitus edocta secretum, quod corde premebat Vincentius Montefius Venegas (hoc iuueni nomen erat, ) illum sanctissimis verbis ad virtutem incendit, adeò vt sobriam, & grauem viuendi rationem instituerit, singulis ad minimum octiduis liuino Epulo refici consuetus. Fæminam præcipitis iracundiæ ad tractabile pacis ingenium, instituta de tranquillitate animi suauissima concione reuocauit, adeo vt fateretur recordatione mansuetissimæ B. Rosæ sopiri, quas cumq; flammæ naturæ ignis accenderet. Religiosum virum cum morte luctantem, & formidine seueri Iudicis trementem, confirmauit oblata illi de suorum exercitiorum qualicumq; censu, quidquid moribundo deesse ad supplendam inopiam meritorum. Ab obitu conueniri se petens à defuncti anima, si sortè indigeret vltiori suffragio. Et diuinitus B. Rosæ innotuit, illam quamprimùm regioni lucis adscriptam fuisse. Mirabatur profectò vnusquisque pauperrimæ B. Rosæ funus publicis mendicorum eiulatibus, ac lacrymis celebratum fuisse, vociferante turba egenorum, suam sibi nutricem ac matrem fato immaturo præreptam: adeo palmas suas extendit ad pauperes, cum his diuidendo eleëmofynas, quas insperato receperat. Fuit cum octo dierum alimoniam sibi subtraxit, pro egentis cuiusdam subsidio: cum triginta sex vlnas candidæ telæ sibi à Matre attributas ad sudaria, vela, mantilia, omuemque candidi nitoris supellectilem formandam pro arbitrio suo, secretò donauit duabus virginibus genere, & virtute nobilibus, at pauperibus: fuit, cum oblongum,

gum, & ad terram vsque demissum Matris pallium. inopi cuidam Virgini donum fecit, & Matri conquestæ prædixit, pluribus illam à diuina bonitate dirandam. Stetit promissis fides; namque post paucos dies, ignotus homo, quadraginta libras argenteas, pro pallio coëmendo attulit Matri. Maria de Sala per famulum misit sericum subtegmen alteri conficiendo sufficiens, & sibi oblatas ad hoc eiusdem materiæ totidem vlnas Limanus Prædicatorum conuentus B. Rosæ matri destinauit. Nobilem Virginem egestate, ac morbo pressam, & purulenti canceri peste nulli ferendam, intra paternas ædes recepit, & medicas illi manus admouit sedulitate tanta, vt brevi ad salutem reuocauerit. Cuiusque sortis, aut conditionis pauperes scēminas, morbis affectas, in domum patriam, inferebat, neque recti solum, & strati, sed & medicinæ, ciborumque solatio egentes, reficiebat. Ijs abstergebat purulenta vlcera, mundabat vestes, lauabat pedes, nullo discrimine Hispanos inter, & Indos, Æthiopesque, nigros, & candidos. Nulla ægritudo tam putrida, nullum vlcus tam tetrum, cui Virgineas adhibere manus B. Rosæ defugeret. Hac ambitione obibat mulierum valetudinaria, & præ ceteris horridas intuita, his eluebat vasa, parabat edulia, lectulum componebat, nil dedignata, si vituata sanies pannis suis adhæreret, quàmuis cateroqui munditiam amaret. Quinimò aliquando cum extractum è vena cuiusdam famulæ sanguinem, post biduum seroso virore, flauis, nigrisque maculis, ac sanie ramosa decolorem stomachus horreret, secessit in angulum, & ad instar Sera-

phicæ suæ Magistræ, totum illum virulentum cruorẽ ausu heroico sensim eporauit. Et B. Rosæ charitas morte fortior non rarò fuit, namque salutem redonauit ægris, quibus ministrabat. Inter alios Ioannes Almantia nòbilis vir, decumbens impetrato B. Rosæ alloquio, in illius vultu maiestatem Angelicam notauit: & hausta viua spe incolumitatis, solutus in somnum est, & integrè sanus euigilauit. Plura curationum miracula in aliud tempus differimus: interim addere libet, quod vel ad bruta animantia B. Rosæ suauitas, ac tenera miseratio protendebatur. Erat Mariæ de Oliua B. Rosæ Genitrici, miræ pulchritudinis pullus gallinaceus, cuius in tergore, & alis versicoloribus amœna plumarum varietas ludebat, & collum, quædam veluti purpura incinxerat, adeò vt domi in delicijs esset. Sed cum iugiter cubaret humi, nec vnquã visus esset in pedes attolli, nunquam auditus cucurire, pertæsa Mater constituit illum iugulare, & mensæ comedendum apponere. Adstans B. Rosa, Canta, inquit, mi pulle, ne moriaris. Vix verbum protulerat, cum sub oculis omnium repentè Gallus adsurrexit in pedes, totum conclaue prætumidis passibus perambulauit, & hilariter eucurruit, repetita, quindecies intra quadrantis horrarij spatium, cantilena.

## C A P V T XVII.

*B. Rosæ magna in Deo fiducia, crebro insuis, suorumque necessitatibus explorata.*

**M**irificè afficiebatur verbis illis Davidicis: Deus in adiutorium meum intende: Domine ad adiuu-



iuuandum me festina: hæc sedens, stans, ambulans deuotissimè iterabat. Tria potissimum erant de quorum assecutione dubitare Rosam non sinebat cælitus concessa fiducia certitudo: primum, æterna sua beatitudo, alterum perpetua, & nunquam interpolanda Dei amicitia: postremum, certum ex alto auxilium in quibusuis necessitatibus, ac repentinis periculis. Semel concussa est pauida formidine circa prædestinationis arcanum omni animæ tremendum, sed illicò Dominus sic illius cor est allocutus. filia neminem condemno, nisi volentem condemnari: igitur ex hinc, tranquili animo esto: Ex inde tam inuicta fiducia cordi Virginis inhaesit, vt interrogata à Doctore Castillo, an suæ salutis certam notitiam diuinitus accepisset, fateri compulsa sit: superna illustratione tempestiuè se didicisse, quòd ab æterno electa erat ad cœlestem gloriam; quin etiam in vltimo decubitu cognouit ab omni purgantis ignis mora, immunem sese futuram. Dum hortensem cellam incolebat, in mentis excessu, vidit circa se vndique solum conspersum rosas, & miranti quonam pacto tam repentinò vere tegetetur terra, paruulus Iesus apparuit, & B. Rosam blandè compellans, iussit sparsas rosas colligere: Lectas illa diuino puerulo attulit, qui ex omnibus vnicam in donum poposcit, &, Hæc tu Rosa es, dixit, cuius prouidam curam assumo: Intellexit illicò sapiens Virgo, quorsum tenderent verba sponsi, & gauisa, teneri se in dextera, veluti Rosam electam, sollicita quid agendum de reliquis esset, breui consilio subitaneum inde sertum confecit, & celesti Infant-

ti reuerenter imposuit, qui mox suauissimè arridēs disparuit. Pari certitudinis solatio fruebatur in securitate gratiæ. diuinęque amicitia, cum cœlitus comperisset, in Sponsi fauore se confirmatam, vt ne vel ad momentum dulci amicitia fœdere posset excidere. Asseuerauit aliquando animæ suæ moderatori, facilius imponendum sibi, quod palea esset. aut saxum, quamquod haberet numen auersum. Eadem vis confidentiæ B. Rosam aduersus quaslibet mortalis vitæ difficultates armarat. Nil metuens obuios tauros ferocissimos persequitur sapius in vestigio, matre fugam circumspiciente, spondens immanes belluas innoxie transituras; quod re ipsa bis contigit, non sine admiratione omnium, qui præsens Virginis exitium metuebant. Vt verò sperabat subsidia ad victum necessaria! Certior aliquando facta, domesticæ penuriæ, quia panes nulli supererant, arcam aperuit & plenam reperit panibus ultra domus illius morem candidis, azymis, ac saporosis, testante figura inusitata & peregrina, hos aliunde prodisse. Alia vice mel defuit, necessarium illis regionibus condimentum: his, ter experti, fundotenus exhaustum arescere vas, filij retulerunt Matri; at illa B. Rosam legauit, quæ cupam inuenit vsque ad supremum labrum recenti melle plenam; quod nouo prodigio integris octo mensibus toti familiæ satis fuit in vsum quotidianum. Gasparem Flores Patrem Virginis premebat ægritudo corporis, animique mœror, ob quinquaginta librarum debitum, cui soluendo non erat. Vt Virgo resciauit, sudat, in Templo preces, & domum redeunti vir pla-

nè ignotus, inuolutam itrophiole pecuniam Patri necessariam porrexit. Eiusmodi peregrinis subsidij pluries egena domus, in gratiam sanctæ filiæ, recreata fuit. Quinimò erga locupletissimum Sponsum, ea fuit B. Rosæ fiducia, ut autu liberali, Virgo pauperima frequenter, & pallam in se receperit, providere de toto sumptu, ad excitandum à fundamentis nouum Sanctæ Catherinæ Senensis monasterium, cuius erectio cœlitus promissa. & ostensa illi fuerat quodque tam seria fiducia sponndit, ut Mater fastidio impar, B. Rosam quasi manifestè delirantem obiurgauerit: Et ubi tibi sunt, diceret, bis centies mille libræ argenti! At illa fideiussorem, inquit, habeo illum, in quo thesauri omnes. Sed hæc teorsim narrabimus.

C A P V T XVIII.

*Beata ROSA, diuinitus cognoscit, adificandum in Vrbe Limana sancta Catharina Senensis Cœnobium. Eidem alia complura arcana Deo reuelante patefunt.*

**F**loret nunc Limæ, numerosum ducentis sacris Virginibus Cœnobium, sub instituto sancti Dominici, erectum anno sæculi huius, vigesimo secundo, ab illustri, & opulenta vidua D. Lucia Guerra de la Daga. Istud integro ante fundationem decennio, nunc per symbola, & figuras, nunc manifestè in propria forma, & typo fuit B. Rosæ diuinitus præmonstratum: De illo tam securè, ac fidenter loquebatur, perinde ac si constructum ante oculos haberet: Designauit perso.

personas, quæ illic Deo famulaturæ essent, ac inter has propriam Matrem, numerum diffiniuit, locum præfixit, futuræ ibidem fabricæ plantam, ac systema in tabella delineauit, primum incipienti sacrificij Mystam, nominatum expressit, primam futurarum Monialium Præfectam ex vultu agnouit, spiritu suo imbuuit, osculo pacis quodammodo initiauit. Nonnullis visæ est in sanire, cum præcipuè illustris fœmina, quam Cœnobij fundatricem fore vaticinata fuerat B. Rosa, superflucem virum haberet, & Matrem circumstaret soboles numerosa quatuor nempe filij, & vna filiola, & qui in se receperat curam, exorandæ à Rege facultatis, Madrito Limam rediisset, infecta re, & nulla spei lux in posterum affulgeret. Sed Lucæ maritum, & paulo post filios omnes, ab hac vita Deus euocauit, ob stacula innumera, & potentissima disiecit, repugnantium animos ad fauorem pij operis flexit, ac breuiter nobilissimus Parthenon, qui etiam nunc sapissimè B. Rosæ Monasterium, hoc est diu ante B. Rosæ vaticinio prænuntiatum, amat appellari. Hoc primum sacileo animo præcepit, cum aliquando lectus in horto Rosas cœpit non sine deuotis suspirijs in altum iactare, & germano fratri superuenienti & quarenti, quid rem inueneret, mysterium celauit, sed capere loqui prodigia, nam quas B. Rosa in sublime sparserat, hærebant in ære, & in conspicuâ sanctæ Crucis figuram apertissime exhibant. eidemque Cruci à succedentibus Rosis decor per circuitum limbus formabatur Agnouit B. Rosa Virgines illas esse, quæ in cruciformem arctioris vitæ Regulam coarctatæ & sublimi perfectionis sta-

tu ter-

tu te  
sun  
tum  
com  
asser  
bilis  
Rosa  
velu  
etor  
lior  
intu  
quæ  
mon  
nam  
null  
vita  
imn  
rum  
pfi  
us c  
lam  
ex  
sacr  
aqu  
etar  
fme  
se c  
dit  
cul  
Ma



tu terram despecturæ erant: Alias oranti fuit ostensum pulcherrimum pratum, lilijs rosisque variegatum; quod in hortum conclusum, & à profani sæculi commercio segregandum certo cognovit. Testis asseruit R. P. Villalobos, Soc. Iesu vir sanctitate nobilis, suo se experimento propheticum spiritum in B. Rosa deprehendisse, quæ sui cordis arcana didicerat, velut etiam R. P. Philippi de Tapia Callaensis Rectoris, & Michaëla de la Massa, Mariæ de Mella aliorumque: ita etiam res, loco, vel tempore difficilis intuebatur animo: diuturnam vitam spondit ægris quàmplurimis, serme iam in hora decretoria cum morte luctantibus: pueris, puellisque prædixit, quodnam vitæ genus ingressuræ essent: spondit, nonnullos religiosæ militiæ nomen duros, licet ab eo vitæ instituto alienissimi essent. Proregis animum immutandum vidit, qui molesto muneri nobilem virum destinauerat: Ferdinando germano fratri scripsit, orituram ex illo filiulam, cuius vultum purpureus conspicuæ B. Rosæ character ornaturus esset, & illam innocentia singulari nobilem fore: aduectam ex Aethiopia scæminam, quæ prostebatur, in Panamâ sacro se fonte lustratam, cognovit, neququam fuisse aqua salutaris respersam, & insperatis indicijs conuictam ad meliorem frugem reuocauit; sacro illa baptismo tincta est, ac postridie felix interijt. Qui B. Rosæ cordium arcana, & quæ ventura trahebantur, ostendit Deus. Eandem legendi, scribendique artem edocuit, vt olim Sanctam Catharinam. Tandem eodem Magistro, suæ mortis diem, locum, horam edocta, nemi-

mini dulcius, quam sibi, suoque tuneri fortunata va-  
res praeinuit.

## C A P V T XIX.

*Beata Rosa mortis suae praescia, cum vltima  
agritudine generosè luctatur, & sanctis-  
simè moritur.*

**F**esta Diuo Bartholomæo dies, quo se morituram  
praesciebat, pretiosa, & chara illi fuit, & studio  
singulari quotannis culta; hinc suo non contenta ieiunio,  
aliquot innocentes pueros induxit, vt secum in  
huius festi peruigilio ieiunarent. Mirabatur Mater  
quid filiae tam peculiare cum sancto Bartholomæo  
verteretur, donec audiuit à Virgine, hunc sibi nuptia-  
lem diem fore. Supererat adhuc B. Rosæ triennium  
mortalitatis. cum ex graui morbo decumbens vide-  
batur omnibus vitae marginem attigisse; at illa omni-  
um iudicio complorata, certo asseruit, distare nimium  
optatissimam metam, ad quam properabat. Annum  
denique suæ ætatis trigessimum primum ingressa, cu-  
ius ad exitum se non deuenturam cognouerat. qua-  
tuor ante obitum mensibus optimè valens, Gundilal-  
ui Quæstoris vxorem admonuit de tempore, ac mor-  
tis genere quo viam vniuersæ carnis ingressura erat;  
quoniam & locum designauit, in quo corporis vincu-  
lis erat soluenda. Didicerat ex celebri visione arcu-  
um, de quo supra locuti sumus, totam seriem imma-  
nium dolorum, quibus vltimò lancinanda erat, eosq;  
acutissimos, & adeò multiplices fore, vt singula ex-  
hausti

hausti corpusculi membra, proprium equuleum essent  
 habitura: siti eadem sese torquendam, quam in Cru-  
 ce Redemptoris fauces aruerunt, intimas ossium me-  
 dulas ardore intolerabili depascendas: Illa tantæ a-  
 maritudinis calicem nil expauescens, in sacello Rosa-  
 rij obtulit sese beneplacito diuino, adeoque strenuè  
 ad epotandum absynthium se comparauit, vt cordis  
 ardor, vultum vehementer accenderit, & satis consti-  
 terit tunc vicini sui obitus præcisam diem illi fuisse  
 reuelatam. Denique triduo ante fatalem ægritudi-  
 nem adiit parentum ædes, vale dictura ibidem hor-  
 tensi cellulæ, cœlestium suarum deliciarum conscia.  
 Hicolorino cantu mortem inuitauit, & miris blandi-  
 tijs S. Patrem suum Dominicum est allocuta, eique  
 matrem à se destituendam commendauit. Calendis  
 Augusti sub vesperam sana, & vegeta suo se cubiculo  
 incluserat, cum ecce sub noctis medium auditur mi-  
 serabiliter eiulare: accurrit Quæstoris Vxor cum fi-  
 liabus, & ancillis, inueniuntque ægram toto corpo-  
 sculo extensam per solum rigidis sine motu mem-  
 bris; At illa interrogata quo malo angeretur, & vel-  
 letne medicum aduocari, malum quidem se nullum  
 habere dixit, sed ipsissimam mortem in intimis visce-  
 rum suorum penetralibus liberrimè dominari; cœlesti  
 verò medico tantum inuisibili opus esse. E terra in-  
 lectulum sublata, frigidus sudor stagnabat in pallida  
 fronte, luctabatur velut ingenti mole pressa respiran-  
 di facultas, rumorque ac tremor exangue corpusculū  
 oberrabant. Subinde libero suspirio, I E S V nomen  
 tenerimè pronunciabat, quod vnicum illi erat solati-  
 um.

um. Adfuere medici, qui statim explorata vi pugnantium morborum, statuerunt, acervum tot cruciatuum humana patientia superiorem videri, neque dolores illos naturales esse ac calicem ipsum, quem Sponsus biberat; iamque miscebat amantissimæ sponse. Et illa quidem à Confessario. verito ne ab humili modestia proveniret B. Rosæ silentium, pro imperio adacta, manifestè aperire, quibusnam cruciatibus intrahelceret, licet experimento morborum omnia genera didicisset, hunc tamen utpotè peregrinum, non nisi per similitudines potuit explicare, dixitque videri sibi candentis ferri globum per tempora adigi, à summo vertice vsque ad infimam plantam dexteri pedis, ignitum veru transmitti, & simili ardore transuersim à sinistro latere per medullium cordis ab ignito pugione peruadi, à quo decussato ardoris tormento forma Crucis exprimebatur; viscera per frustra candenti forcipe euelli: caput inclusum candenti galeæ videri, & validis puncturis ceu malleorum ictibus contundi; ossa resolui sensim in puluerem, medullas instar cinerum aruisse. Fluctuantibus in mutuo aspectu contulis medicis, B. Rosa clam suo Confessario aperuit, frustra illos in exploranda morbi specie laborare, cum totus præter naturam esset, quo circa vnica sibi tolerantia opus fore, ut quoquo modo singulos Crucifixi Sponsi sui dolores expertretur: sinerent illam absq; omni humano alloquio aliquot dies iacere, cūq; amore suo, cui se mēbratim confixam in cruce sentiebat, colloqui perpetuo. Præfixa Augusti dies interim illuxit, quā in Caluarie mōre, non in Thabor cum Christo transfigurato

trans.



transegit; namque accessit sinistri lateris paralyfis, perque consequentes dies pleuritis, asthma, ischiades, colica, arthritidis, denique continua febris, ardor accerrimus. Vsq̃ adeò tota morborum cohors debuit incumbere, vt vnica hæc B. Rosa, fatali ægritudine solueretur, & articulatim moriens, gloriosum ferè martyrium ab amore Sponso illatum, subiret. Placidissima, tot inter cruciatus, animæ quiete, fruebatur, suosque dolores intendi, & vberiores pœnas suis criminibus irrogari, flagitabat. Subuerebatur Virgo sapiens, ne tot simul morborum continua, & atrox violentia, sibi rationis vsum eriperet, ideoque tremula voce, flebilique, supplex obsecrauit domesticos, se cum orarent Deum, vt illi se infortunio eriperet: & diuina pietas respexit humilitatem ancillæ suæ, & integrum illi expediti iudicij, ac linguæ vigorem peculiari prodigio, inter assidua ex hausti cerebri deliquia, seruauit immunem vsque ad extremum halitum; cum tamen sæpe, inter hos angores, ab vsu exteriorum sensuum illam abduxerit, vel morbi violētia, vel contemplationum excessus. Incredibili siti torquebatur. cumque bibere sibi per medicos non liceret, amarum tolerantia calicem, ad imum vsque fundum, exhauriebat cum Sponso. Tenuerrimam conscientiam, exomologesi pluries iterata, ac semel de toto vitæ decursu sese accusans, quam diligentissimè expiauit; ita vt procul audirentur gemitus, & suspiria. Triduo ante felicem transitum, diuinum viaticum, & sacrum oleum poposcit. Vt audiuit, epulum Eucharisticum sibi afferri, viuido colore suffusa coruscantis aurore

instar gratiosè rubuit, mox gaudio suo impar, in altissimam extasim dirigit, & suscepto diuino Sacramento, pallido & exangui ore, fixa hæsit. At, extremam vnctionem tam alacri omnium sensuum officio moribunda excepit, vt verè oleum lætitiæ fuerit, quo se potius ad triumphum, quàm ad agonis conflictum sensit animari, vtpotè salutis adeò certa, vt insuper nosset, absque lustralis igni contactu, se recto itinere, ad Sponsi nuptias protecturam. Sæpius elata, & sonora voce, se orthodoxæ fidei filiam, professæ est, ac Sancti Dominici sobolem, candidum eius Ordinis intersigne, quod scapulare dicimus, continuè, & parule ante se protensum volens. Exquisitis, ac summè efficacibus verbis, veniam à Deo exorauit, pro illis omnibus, qui in toto vitæ decursu, molestijs, damnis, alijsque se iniurijs affecerant, & Crucifixi paruum simulachrum manu stringens, satiari non poterat his verbis: *Pater ignosce illis.* Domesticos omnes, acciri demissè petijt, & licet ex his neminem verbo, aut minimo vnquam nutu offendisset, à singulis, & omnibus lacrymosa voce, orauit condonari sibi, si qua in re vlli molesta accidisset: dolere, quod adhuc per biduum, illis oneri esset futura: haud procul abesse horam, quæ domum Gundisalui, à fœtidæ Rosæ, longo fastidio, inutilique pondere, liberaret. Nemo fuit, cui hæc verba vberes lacrymas non excusserint, omnes enim eximiam illius sanctitatem mirum in modum, venerabantur. At Quæstor metuens, ne post obitum B. Rosæ, de condendo tanti funeris thesauro lis inter Patrochiam, & Sancti Dominici Conuentum exurgeret,

ret n  
cum  
apud  
men  
fuit  
luti  
mus  
Virg  
bus  
ij/de  
bat i  
tate  
laci  
Pau  
lio  
secr  
cun  
ria,  
nun  
che  
me  
quo  
con  
sim  
effi  
uie  
nie  
Ge  
hi  
ba  
sic

ret nec ausus modestissima Virgini, periculū honorificum illud aperire, ingenioso consilio dixit, obtinēdæ, apud Fratres Prædicatores, sepulturæ desiderium potius mendicando, quam testando innueret: quod ipsa præstuit, cum sui Ordinis esse morem existimans, & veluti indignam, expelli se posse timens, nisi hoc infimus precibus, impetraret. Sub vitæ finem, crebriora Virgini fuere dulcissimorum raptuum intervalla, quibus paratæ cœlestis gloriæ sapor, iam delibabat, & iisdem gradibus, quibus debile corpusculum fatiscēbat in mortem, animus in vigorem, & securam hilaritatem attollebatur, adeo, ut auctam in singulas horas letitiam, nec voce nec vultu, dissimulare iam posset. Paucis ante obitum horis, ab humanarum rerum exilio in se regressa, P. Fr. Francisco Nieto ingenuē, ac secretò dixit: Oh quā excelsa, quā pretiosa, iucunda, eximia, tibi, de suavitāte Dei, de lātā ipsius curia, de regione æternitatis narranda haberem? vado nunc, cum tripudio ad perenniter contuendam pulcherrimam illam faciem, quam toto peregrinationis meæ exilio, quæsiui. Omni deinde officio parentes, quosq; parentum loco habuerat, Gundisaluum, eiusq; coniugem, est prosequuta: tum germanos fratres sensim, deinde Quæstoris filias, tum reliquos domesticos efficacissima oratione, ad amorem virtutis, inflammavit. Media nocte clamor factus est, & Sponsus venit, quem B. Rosa vultu sereno, & hilari excepit: Germano fratri innuit se migrare, & cervical subtrahi iussit, ut capite, ad nudum lignum acclinato, delibaret Crucis incommoda, & IESVS, IESVS mecum sit, dulcissimè ingeminans, ad illum euolauit. CA.

## CAPVT XX.

*Beata Rosa & funebris conductus, exequia, tumulus; eiusdem sepulchrum Ordinarij auctoritate mutatum solemni Corporis translatione, & ingens Fama sanctitatis.*

**V**luidus faciei, color, labia rubētia, & in risum diducta, ambiguum fecere adstantibus B. Rosæ mortem donec adhibito speculo, patuit, nullum in ea superesse halitum. Tunc omnes, repentino prodigio peruasit arcanus lætitiæ sensus, ac tota domus visa est innatare, gaudio nuptiali. Ex adstantibus vna, vidit numerosa Angelorum corona, B. Rosæ lectum circumdari, eademque iurato asseruit, ante felicem B. Rosæ transitum fuisse à Christo reuelatum, Virginis mortem fore admirabilem, & sepulturam gloriosam, & vetuisse ne funeri circumponerentur panni lugubres, sed imperasse, vt niuei quique triumphum decerent. Ac triumphantis quidem in morem, deducta ad Tumulum B. Rosa fuit, namque vix dies illuxerat, cum ad Quæstoris ædes, innumera hominum vis accurrit, mirantibus domesticis, vnde, aut quo pacto, nuncium defunctæ & calentis adhuc B. Rosæ, tota Vrbe diffundi potuerit. Circumfusi promiscue nobiles, ignobiles, aduenæ, Ciues, Indi, Hispani certatim Rosaria sancto Corpori applicuerunt: Hic flores vesti impositos, diripere; hic vestis extrema, hic pedes raptim deosculari. Tentauerant pluries oculos defunctæ Virginis obtegere, adductis palpebris, sed frustra

stra nam sensim recedentes, liberum Colūbinis, pupil-  
lis aditum dabant, ut Limenenses suos dulciter intueren-  
tur. Nisi Prorex, armatæ suæ custodiæ, Cohortem  
prætoriam eò destinasset, explicare se domo funebris  
pompa non potuisset; adeò turba innumera comple-  
uerat atrium, ambulacra, & angulos omnes: Quin &  
plateas, fora, vicos, qua transeundum erat, aliquot  
ante horis occupauerat. Ideo Archiepiscopus, qui  
prodierat funus deducturus, ad Gundisalui ædes elu-  
ctari diffidens, rectâ perrexit ad Templum, Diui Do-  
minici, ibique ad valuas Virgineum. funus præsto-  
latus est. Interim sacra omnia sodalitia, Religiosæ fa-  
milix, confluxere, & ipsum Metropolitanum Collegi-  
um, præter morem ultro adfuit; namque solum Ar-  
chiepiscopos, solet efferre. Accessit amplissima Curia  
Senatorum, qui honos, defunctis Proregibus præsta-  
ri solet. Matronarum ambitiosa pietas, & visendi  
ardor fenestras, pergulas, arcus occupauerat, & certè  
numquam alias sic visa est vniuersa Ciuitas commo-  
ueri. Supposuit humeros feretro, Capitulum Metro-  
politanum, deinde, mutatis vicibus, Curia Senato-  
rum, mox Primores ex Religiosis Ordinibus. Feriebant  
sydera clamores, Sanctam afferentes B. Rosam, & nisi  
hastatorum bipennes, quasi sepe obiecissent corpori,  
pars illius exigua templo fuisset illata. Ut limen atti-  
git, noua iucunditate exhilarescere visa est Virginea  
facies, & in Sacello, cui à Rosario nomen est, prodi-  
giosa imago Dei paræ repentè fulgore insolito micuit,  
& manifestis lætitiæ argumentis, visa est excipere B.  
Rosam suam. Mox eò confluxit torrens, ingentis po-  
puli,



puli, cumque omnes viderint splendores insuetos, fuerunt etiam qui suspicarentur, imaginem portento- so sudore maduisse. Tumulum Beatæ Rois, circū- scribebant Patres dignitate, & senio grauiore, tūc ne thesaurus ille diriperetur, tūc ut eidem ad- mouerent debiles, & claudos, qui spe obtinendæ sa- lutis accedebant, neque spe frustrati sunt, ut conle- quenti capite, palam fiet. Ponē constitit hactata Proregis Cohors, ut confusam molem irruentis po- puli distineret, si posset. Sepulchro tradere sacrum Corpus destinabant Patres, cum tanta insonuit popu- li vociferatio, ut supersedendum fuerit, & nisi certa spe lactatus fuisset populus, donum nemo se recepisset. Sed turba, quæ templum infederat, dilapsa, con- fluxit alia, & Archiepiscopus nutu, namque vox au- diri non poterat, iussit corpus Virginis in Sacristiam deportari, cumque nec ibi esset in tuto, raptim inferri adytis Nouitiorum. Ibi Archiprætul iussus in ge- nuâ, manum Virginis deuotè osculatus, eam in singu- lis digitorum articulis, perinde ac si viueret, tracta- bilem sensit. Postridie laxatis templi foribus, & rela- to Virgineo corpore, vndatim irruit admissus popu- lus, neque incolæ tantum; sed & remotiores accolæ, qui à sex, & amplius leucis accurrerant. Proregis mi- lites, impetum frenare non potuerunt, ideoque omnis ætas, & sexus, ad feretrum eluctari contendit: hic calculos precarios, alius sudarium, numisma, & quid- quid ad manus erat, contingendo sacro Corpori præ- tendebat. Turba languentium penè cum iurgio fe- stinabat accessum, pueri per obstantium capita subli-

mes mittebantur ad contactum salutis, & vix ipsum corpus seruari potuit, cum velis, capillis, & vestibus direptis sexies mutanda B. Rosæ fuerint indumenta. Resonabat vndequaq; templū. perpetuis vocibus Sanctam proclamantium, & pulsu, ac tintinnabulis signum dabatur choro, cum respondendum erat Sacerdoti ad Aram facienti, Sed nisi Cantores Choro egressi, ipsum Altare circumstetissent, consummata non fuissent diuina Mysteria. Anxistes è throno progressus ad feretrum, vltimam efferendi ad tumulum, corporis pompam adornabat, cum iterum validioribus ingenuit clamoribus stupata turba, rursus dentato cuneo, vnd que irruit in suggestum, ideoque præsens periculum direptionis diuertendum fuit, oblata populo dilatione sepulturæ. Confirmauit spem pulchritudo, & suauolentia Virginæ corporis, quæ, nullum fore periculum, spondebat, si vel in plurimos dies publico conspectui superesset. Per sex horas supra triginta, idem perstiterat oris decor, oculorum patentiū fulgor, & candor manuum: Nulla infederat vultui fuligo sub aère tam humido, calido, & ex concurrentium refluxibus, puluerulento. At mirifica Cælestis odoris fragrantia, si irans à sacro Corpusculo, post decem & nouem mentes, recreauit illos, qui ex humanam B. Rosam nobiliori sepulchro crediderunt. Sub meridiem clausis templi foribus, & elusa spe populi redituri, conditum est B. Rosæ corpus, in præparata è Cedro arca, & in æde Capitulari sepultum. Vt primum fores patuere, irruit vnda populi, & Sanctam inclamans, puluerem sepulchri, terramque certatim aspor-

asportauit. Inde continuo fluxu rhedarum, paterna B:  
 Rosæ domus frequentari cœpit à nobilibus viris, qui  
 hortensem cellulam venerabantur, quam Virgo soli-  
 tudinis studio, inhabitauerat. Eximia prodigia, quæ  
 palam crebrescebant, mirum in modum commenda-  
 bant populo sepulchrum Virginis, cui nondum vide-  
 batur exhibitus debitus cultus. Idcirco solemniores  
 instaurare exequias, quibus ipse Prorex interesset, sta-  
 tutum fuit, cumque diu inter illum, & Archiepisco-  
 pum amica quæstio agitata fuerit, eò quod præstituta  
 dies, & sæpe variata, semper alterutri incommoda  
 accideret, tandem ambo in quartam Septembris con-  
 uenerunt, omnino inscij eam Sanctæ Rosæ Viterbien-  
 sis, honori dedicatam esse. Tota iterum sedibus suis  
 emota Ciuitas, templum impleuit, & dum Sacerdos  
 Numini commendabat B. Rosam, voce non impari  
 sese populus commendabat Beatæ Rosæ, cuius fama  
 celeberrima, breui totius Regni oppida, permeauit.  
 Potosi, trecentis leucis Lima distitum, in communem  
 gratulationis impetum efferbuit, sonnere in turribus  
 æra campana, micuere luminaria, & tota passim regio  
 Peruana, Beatam Rosam celebrauit, à qua cuncti po-  
 pulariter sibi suffragium pollicebantur: Neque tractu  
 temporis, elanguit populi ardor, namque miraculo-  
 rum celebritas; & multitudo in dies, ad inuisendum  
 B. Rosæ sepulchrum, plures accersebat, ideo cum tota  
 Vrbs, & vulgus pariter, & vtriusque ordinis Princi-  
 pes, assererent Beatam Rosam, communem Limensi-  
 um thesaurum, publico deberi. Archiepiscopus, omni-  
 um ardentissimo studio, libenter annuit, & initio anni

1619. prodijt è sepulchro Virgineum corpus incorruptum, & suauissimum odorem inhalans. Celeberrima pompa delatum fuit in templum, vbi egregius orator, de admirabili B. Rosæ Sanctitate verba fecit, ac tandem illata Virgo fuit cryptæ ad dexteram summi Altaris, vbi cum nimium glisceret populi turba, namque omnes, ad sepulchrum Virginis, velut ad secundam aram, subito conuertebantur: hic perpetuus tumultus erat offerentium vota, suspendentium anathemata, deponentium scipiones, consulendum fuit reuerentiæ sacri Tabernaculi, translatis exuvijs B. Rosæ, in Sacellum Sanctæ Catharinæ Senensis. Interim Limam, peuenere literæ Apostolicæ, quibus autorati Iudices, Tribunal ex formula sacrorum Rituum erexere, vt examen instituerent de vita, & gestis Ancillæ Dei Sororis B. Rosæ à Sancta MARIA. Adfuere testes 183. cumque solum superesset inspectio Reliquiarum, delegati ad hoc munus, repererunt virgineum corpus, expleto post obitum anno ferè iam quintodecimo, ossibus integris, & sicca hinc inde carne obductis, spirans odorem, quo fragrant siccata ad Solem Rosæ. Hinc aulam Capituli adiere lustraturi primum Virginis sepulchrum, è quo certatim fideles hauriebant puluerem ad varia morborum genera depellenda, cūq; non nisi quinque pondo terræ visa sint eruta, aliunde constitit, complures modios ex illomet foramine fuisse effossos. Sed cum exinde Procurator Generalis Ordinis Prædicatorum, admonuisset Limentes Patres, habendam esse rationem constitutionis Urbani VIII.

qua

qua Viris nondum albo Beatorum adscriptis, Apostolica auctoritate, publicus honor interdicitur, illico intempestiuum cultum, venerabilis B. Rosæ, abolendum censuerunt. Populus Sacellum quæstibus impleuit, & sparso in vulgus rumore, clam in Hispaniam delatum esse B. Rosæ corpus, non leue periculum imminuit Religiosis viris, qui non sine labore compescuere turbas, ostendentes, ita consulendam illustrioribus B. Rosæ honoribus, qui ab Apostolica Sede sperantur. Et his quidem præludit eximia fama Sanctitatis, quæ omnes rapit in admirationem B. Rosæ. Nimum quantum protenderetur hoc qualecumque compendium, si elogia Præstantium Virorum, hic subnecterentur. Non tantum sacra D. Dominici Familia, literis communi nomine datis, Sanctam illam, admirabilem, clarissimam illustrem miraculis, & prophetico spiritu, in quæ omnibus D. Catharinæ Senensi, supparem dicit, sed & Limense Cœnobium, Patrum sanctæ MARIÆ de Mercede, & Nicolaus Mastrillus Duran, Prouincialis Societatis IESU, communibus suorum votis, & Sacer Ordo Beati Ioannis Dei, & Patres Eremitarum Sancti Augustini, & Minorum Sancti Francisci, & Ecclesiæ Metropolitanæ Limensis nomine datæ literæ, Summum Pontificem, infimis precibus exorant, vt in Sanctos referat Rosam, & tutelarem Limæ concedat: Eius virtutes enumerant, ac notissimam Sanctitatem & admiranda prodigia. Addenda hic esset relatio perhonorifica, qua, Eminentissimus Princeps Decius Cardinalis Azzolinus, in sacra Rituum Congregatione coram



coram Sanctissimo D. N. die 15 Septembris 1663. Beata Rosa virtutes enumeravit, & supplices literas, nouem diuersorum Ordinum, ac illustrium Virorum Limentium, tres Regis Catholici, tres itidem Eminentiissimi, Cardinalis de Aragonia, & binas Magistri Generalis Ordinis Prædicatorum, & perseuerantiam, & augmentum famæ Sanctitatis, & deuotionem Populorum, quam amplificatam dicit miraculis supra centum nouemdecim ex processu remissoriali auctoritate Apostolica confecto.

C A P V T XXI.

*Beata Rosa, post mortem, & sapissimè & multis apparuit gloriosa. Eadem in scelestorum conuersionibus, & obstinatione cordium emollienda, mirabilis.*

**P**refari libet. hæc etiam quæ consequuntur, prodigia ex authenticis processibus Signorum, Gratiarum, & Miraculorum fuisse delecta. Aloysia de Serrano, vt sapissimè Beatam Rosam immortalem vidit, ita semel præsertim, inter agmina Beatorum, & Deipara Virgine deductam ad Solium diuinum, & immente gloriæ corona, decoratam. Testatum reliquit coram Apostolicis Iudicibus Quæstor Gundisaluis viginti, & tribus vicibus, Sancto Viro conspicuam fuisse gloriam Beata Rosa, quæ pariter Doctores Del Castillo, videndam se præbuit in fulgidissimo lumine resis vndique circumdatam. Deinde vero, plusquam quinquagies eidem illuxit, multa,

multa, ac sublimia illi edifferens, de felicitatis suæ excelfo fastigio; quin idem in postrema depositione anni 1631. persanctè asseuerauit; integro sex mensium spatio, interdiu, noctuque, se diuinitus admissum ad tantæ beatitatis spectaculum, ac deinde Cœlesti Ephæbo à B. Rosa imperatum, ut suas vices obiret. Quàmplurimis alijs, notæ Sanctitatis. B. Rosa videntem se obtulit, nunc in Cœli viridarijs cum Christo perambulans, nunc eidem Limanam Urbem, & Regnum Peruanum commendans, nunc vultu hilari, & iucundo nutu probans ea, quæ reserebantur in tabulis à Quæsitibus virtutum suarum, nunc adornans conclaue; chartam dirigens, & graphiaria instrumenta, Notarijs disponens, excepturis ea, quæ testes proferebant in commendationem sui, & ridentiore, visa gratiam pro obsequio sibi exhibito, spirare. Fuit etiam, quæ nocte concubia hæc verba audiuit: B. Rosa verè Sancta est, quibus confirmata sunt ea, quæ de Rosæ Virtutibus, iurato protulerat. At Didaco Hyacintho Paceco qui ex quotidiano hypographicæ artis lucro victitans iussus fuerat in causa venerabilis B. Rosæ, bis mille folia processuum, seu actorum intra certum tempus scribendo absoluerè, iamque desperabat se oneri parem fore; adeò lassabantur digiti stupebat brachium, diuaricabantur nerui, in somnis B. Rosa se scribæ suo exhibuit, & leniter accedens, dexterum iacentis brachium commiter arripuit, validè strinxit; & euigilans Pacecus, scripsit ab aurora ad vsque Solis occasum, nulla digitorum lassitudine, nullo cruciatu neruorum, brachio leuissimo,

fimo, & supra modum expedito. Perrexit deinde reliquos dies scriptioni laboriosa, citra laborem impendere, attonitis quicumque Pacecum nouerant, eusque pulcherimum characterem tot chartis, illitum viderunt. Decumbebat in Limano Cœnobio P. M. Augustinus de Vega, Ordinis Prædicatorum tunc Peruuæ Prouincialis, iamque de hominis vita conclamatum erat, cum B. Rosa Christophoro de Ortega, suis in ædibus dormienti, Imperat primo diluculo Cœnobium adeat, & Prouincialem moribundum conueniat, denunciatis, nequaquam illum tunc è viuis abiturum, sed aliquandiù sub Episcopali insula in vinea Domini laboraturum, quod re ipsa contigit. Celeberrima peccatorum apud Deum Causidica, vt conuertantur, & viuant, B. Rosa fuit. Quàm plurimi ad solum Virginei corporis in feretro contactum, ita fuere compunctionis stimulo perculsi, vt ibidem exsperint coram populo elatis vocibus, sua scelera detestari, & inter hos nonnulli iuuenes liberioris vitæ, qui eo solum consilio venerant, vt defunctam pulcherrimam Virginem, intuerentur. Successiuis deinde interuallis, ad Mariam de Olius B. Rosæ Matrem, iuere complures, etiam ex Religiosis ordinibus: vt illius egestatem, aliquo subsidio recrearent, professi hoc se tributum pendere B. Rosæ, cui debebant felicè suæ vitæ permutationem. Quidam profligatæ conscientiæ, vir, nunquam toto sacrilegæ vitæ suæ decursu vitæ confessus, at alterius pietate B. Rosæ commédatus, ab annoso conscientiæ lethargo euigilauit, adeoque animum, quem callus obduxerat, timor Domi-

Dominiemolliuit vt deinceps vmbra sceleris horruerit. Ex conuulsi plurimorum, qui confessiones exceperant, testimonio, liquidò constat, post imploratum B. Rosæ in Cœlis auxilium, innumeros tùm Lima, tùm in vniuerso Regno, ex abyssis scelerum emeruisse, quod beneficii genus inter validiora solidæ Sanctitatis argumenta, ex communi Sanctorum Doctorum sententia, meritò computatur. Quid quod Lima paucis à Virginis obitu diebus, tortilia, disciplinarum flagella, setarum cingula, & variæ sortis cilicia, ob emptorum multitudinem subito defecerunt: Insignes peccatrices, luxuriæ nodis exutæ, in calle Virtutis, constantem fixere pedem: In vniuersa Peruana regione, Sacramentalis pœnitentiæ administri communicatis indicijs, adstupere tantam morum mutationem in populo, à die, qua Beata Rosa in Sponsi sui Regno cœpit agere causam Civium suorum. Fœminæ, certatim abiecere vestium luxum, Religiosa claustra cruentis flagrorum ictibus, perpetuò personuerunt, Confessariorum vbique sedilia planctu & gemitibus sunt obfessa, & vir grauissimus iuratus asseruit, ex quo Peruvia nostris detecta patuit, nulum inclarusse diuini verbi concionatorem, qui tam vniuersalem pœnitentiæ spiritum, & luculentum pietatis incendium excitauerit. Et egregiæ quoque virtutis viros, ad studium Sanctitatis accendit, veluti Patrem Iohannem de Villa lobos, Rectorem Tyronum Societatis IESU, qui cum à moritura B. Rosa postulasset, vt se traheret in odorem virtutum suarum, ab eius obitu, sensit arcanas cordis sui yunctiones, & stricturas in-

solu-

solita  
cum  
rebel  
tem,  
suis,  
octo  
à Fra  
scido  
& ha  
rum  
conc  
inno  
esse  
Ros  
ante  
Lud  
sa S  
inu  
ere  
pel  
luti  
sta  
San  
lab  
ma

B  
ti  
d

solitas, luminum diuinorum. Quidquòd & quò-  
cumque libitum illi fuit, Beata Rosa pertraxit animos  
rebellantes. Mariam de Xuara, fœminam prædiui-  
tem, & opulentam, implacabiliter auersam priuignis  
suis, Francisco, & Alexandro de Coloma, & eorum  
octo Consobrinis pauperrimis, ita emolliuit exorata  
à Francisco, vt consequenti manè, illico matertera re-  
sciderit testamentum, quo alijs omnia sua legauerat,  
& hæredes ex asse scripserit. quos antea oderat mi-  
rum in modum: Ludouica Barba, vix non exanimis  
concidebat, cum audiret à Confessario suo, diuinitus  
innotuisse Beatæ Rosæ, quòd ipsa religiosum habitum  
esset aliquando indutura; sed illicò à morte Beatæ  
Rosæ, Ludouica, exarsit ambitu sacræ vestis. quam  
antea veluti Medusæ vultum, horruerat. Alteram  
Ludouicam de Mendoza, incertam, ac de Beatæ Ro-  
sæ Sanctitate animo fluctuantem, repentinus angor  
inuasit, adeò vt manibus, pedibusque mutilatam se  
credideret: grauior eiusdem spiritum caligo, ac tem-  
pestas mentem obsedit, ac turbatum cor quodam ve-  
luti terræmotu succuti cæpit; quæ omnia euanuerunt  
statim, atque elatis vocibus intonuit: Beata Rosa verè  
Sancta est. Vsq̃ue adeò pro Sponsæ suæ honore ze-  
labat Sponsus ille diuinus, cui venti obediunt, &  
mare.

### CAPVT VLTIMVM.

*Beata ROSÆ defuncta attactu, odore, venera-  
tione, mors, morbi, pericula depelluntur. Eius-  
dem cingulam, vestes, sepulchro exemptus pul-  
uis,*



*uis, & pictæ imagines, phrænesim, cancrum, le-  
pram, & omne morborum genus, mirabi-  
liter currant.*

**Q**UAMVIS perpetuum prodigium fuerit Beatæ Ro-  
sæ vita, innumeris illam à aliorum salutem mi-  
raculis decorauit Deus, quæ si omnia percererem,  
procul à compendij legibus, iret historia nostra. Præ-  
stantiora quædam sufficiat indicasse; inter quæ prin-  
cipem locum tenet reuocata ad vitam Magdalena de  
Torres, filiola semestris Gregorij Agricolæ, quæ cum  
exanimis à vespere, ad vsque postera diei lucem, iacu-  
isset, iamque paratus effodiendo sepulchro sarculus  
adstaret, attractu vestis Beatæ Rosæ, illicò viua, & sa-  
na, in lecto confedit. Antonius Bran, tribus mensi-  
bus cum febris, & angore pectoris congestus, tandem  
iacuit sine motu, anhelitu, vllouè vel minimo signo  
vitali, nec veilicatione, vel pulsu vllum à gelido cor-  
pore, potuit extundi argumentum superstitis vitæ,  
quam tamen post aliquod tempus, in corpus reuocauit  
Beata Rosa, ab adstantibus implorata. Dum in tem-  
plo supersuit virginium corpus, quàm plurimis mani-  
festam salutem attulit, veluti Elizabethæ Duran, cu-  
ius brachium à multo tempore siccum, & inutile hu-  
mana ope curari non posse, Medici statuerant: Et  
seruus Æthiops, qui dexteri brachij, manusque vsum  
ex plica, & neruorum attractione amiserat: Et Ge-  
orgius de Aranda Presbyter, qui ob excepta in sini-  
stro brachio vulnera, in bello Chilenfi, sanie, con-  
uulsione, ac tumore attractam manum, vegetam, sa-  
nam,

nam, & flexibilem reperit: Et Alphonsus Diaz mendicus, toti Lima notissimus, qui humili nixus fulcro manumque & pedem ex attractione inutiles per solum trahens, illicò exiliuit in pedes, postquam ad Beatæ Rosæ tumulum, orauit: Adreperunt & pueri duo Æthiopes, quorum alter nec palmum à terra erigere se, alter vix grallis vtrumque librare se poterat, & Beatæ Rosæ beneficio, extemplo incolumes, duxere per templum choreas. Pueros quàmplures, varijs morbis implicitos, repente Beata Rosa incolumitate donauit, ideoque certatim de manu in manum porrigebantur, vt ad salutiferum contractum, peruenirent. Quid porro enumerem, reuocatos à faucibus mortis, adhibito cingulo, velis, particulis vestium, aut alijs, quæ pia sedulitas, Beatæ Rosæ corpori, admouerat? Nullum penè genus ægritudinis esse reor, quo aliqui pertentati, salutem Beatæ Rosæ, non debuerint. Et capite laborantes, & intolerabili cruciatu dentium, & oculis aliquamdiu capti, & cancræna perusti, lepra, impetigine, apostemate, arthritide, hydrocela, angina, ad vltimum vitæ discrimen adducti: Et ex alto in profundas foueas prolapsi, & ab equis, super irruentibus, oppressi: Et qui mortem hauserant in poculis venenatis: Et quibus non nisi ad dolorem & onus, luxata brachia, pedesue, supererant. At, quos vrebatur ardentissima febris, tam præsentem Beatæ Rosæ opem experti sunt, vt omnem adnotandorum nominum diligentiam superauerint, & Ioannes Lobo Presbyter, sacramento coram Iudicibus firmauerit, se diuersissimis locis Chuquisacæ, Potosij, Oruræ, alibi


alibi flagitantibus promiscuè omnis ætatis, sexus, conditionis infirmis præbuisse potum viuificæ terræ, exemptæ sepulchro Beatæ Rosæ, & illicò in omnium conspectu ferè innumera curata fuisse languorum genera, & febres præcipuè statim abactas. Pepercerat hæc terra, prodigiosè corpori Beatæ Rosæ, namque cum Limense Cœnobium, trecentos numeret Religiosos viros, vt aula Capitularis, excipere possit omnia decedentium cadauera, ex agro Panamæ aduecta gleba fuit tenuis, soluta, arenosa, & innato calore subtiliter vorax, quo extemplò resoluat ossium duritiam, & ingesta funera, absumat. Mirum dictu! vnico, totoque illo spatio, vbi sacrum Beatæ Rosæ corpus immissum fuit, gleba mutauit indolem, ac ferè pumicea soliditate, in se coacta obduruit, vt solum ibi digitis, leuique manu teri, aut frangi nequeat, quin ferro opus sit, vt excauetur: non sic reliqua illius cimiterij tuburra, tritu facillima, tractabilis, fluuida. Porro in hoc Beatæ Rosæ Cœnographio, ad perenne humani generis beneficium, viua salutiferi pulueris scaturigo laret, quod præsertim patuit anno 1622. cum post exportatos inde, totoque Regno distributos terræ cophinos, vix tria, vel quatuor pondo cauo strobiculo, eruta visa sunt. Et cum Pater F. Bernardus Marques paucis ante diebus, totum immisisset brachium forami, paulò post succrescente intus puluere, vix manum immergere totum potuit. Sexenni Virgini multuculos gutturales inflammabat Synnanche, & Chirurgus vlcere inspecto, negauerat puellam curari posse, namque cancrena, se plagæ insinauerat, & erosa car-

nes frustillatim vlceri excidebant: atque indies, serpebat malum. At, epoto salutifero puluere conualluit. Ab annis viginti, Abbatilla Monasterij Sanctæ Claræ, miserrimè torquebatur ex inflatione tibiæ, in qua sparsim, plusquam quadraginta vlcerum habant ora, sed & febrim per viscera læuientem extinxit, & vulnera clausit, puluis hic salutaris. Sed quid singula enumerem? Fœminas præcipuè puerperij doloribus tabescentes, præsentissimo auxilio Sanctæ Rosæ læpissimè recreauit, idcirco quamplurimis pueris, ac puellis additum fuit cognomen, de Rosa, in perpetuum beneficij monumentum. Ipsa natura voluit aliquando superesse mnemosynon beneficij à Sancta Rosa collati, veluti in Petro de Quixano, qui cum transversim, actus in vtero matrem exanimaret; ope Sanctæ Rosæ prodiuit statim, pictam gerens in dextera palpebra, Rosam. Et aliàs, huic noui Orbis Thaumaturgæ obtemperarunt mutatæ naturæ vices, vt quando, Tauros ferociter irruentes compescuit & piscibus imperauit, vt in retia confluerent, & puellæ decenni vires addidit, vt pondus erigeret, cui quatuor robusti baiuli impares fore credebantur. Quin etiam mentem, aliquibus ab eius statu dimotis, illico redonauit. Hinc vniuersæ Peruuæ incolis, commune studium fuit, in prodigiosæ virtutis memoriam, passim per ædes, Sanctæ Rosæ effigiem habere, cuius osculo, quàm plurimicum morte luctantes, enormiter laucij, per humum solutis membris repentes, salutem illico receperunt. Ex his imaginibus, aliquæ pallentem Sanctæ Rosæ vultum referentes, visæ sunt venustè in genis rube-

re, & blando fulgore hilaritatis suæ, omnium animos accendere ea die, qua publicè perlectæ sunt Apostolicæ literæ, compellentes vndique fideles, ad Sanctæ Rosæ prodigia, sacris Iudiciis deferenda. Sed accipe ipsa verba Sacræ Congregationis, miracula approbantis, Heroica. I. Præseruationis à vicina morte Ioannis Zelilij, per quatuor Meales oppressi febris Hæctica tertiæ speciei, progressa in exquisitum marasimum, cum pulmonis vlcere, tussi marcidum sanguinem excreante, ac gutture pariter vlcerato, cui etiam superuenerat febris putrida, ac maligna, adeò, quòd susceptis omnibus moribundorum Sacramentis ad extremum redactus agonem iacuerit absque motu, & arteriarum pulsu trium Medicorum voce iam proclamatus: qui demum S. Rosæ auxilio implorato, sumptoq; sepulchri eiusdem puluere, in cochleari aquâ resoluta, confectum salutem cum pristino vigore, recuperavit II. Candidæ Rosetæ, Vexilliferi Aloysij de Caruaial Hispani vxoris, cui in partu fetus præmortui, conatus nimius, pro emissionem secundarum, per triduum adhibitus, vnâ cum illis extruserat matricem, quæ deinde frigifacta, marmoris instar obdurata, nigra, visuq; horrida, prægrandis, ac trium librarum pondere grauis, cum ingenti cruciatu, per ostennum sic permansit foris, donec Sanctæ huius (cui se impensè commendauit) Imagine papyraceâ ventri ipsius applicatâ, statim comperit matricem in aluum sibi rediisse, vnde illicò sana & robusta lecto exiliit, ac per domum præ gaudio visi est saltitare. III. Fr. Seraphini Puglisi ex Ordine B. Mariæ de Monte




Monte Carmelo, qui laborans febris malignâ ac decimo septimo suæ infirmitatis die, derelictus à Medico asseuerante moriturum noctis insequentis horâ quintâ vel sextâ, visu & loquelâ destitutus, ac in agone positus, ope huius Sanctæ, ex toto corde implo- ratâ ( quæ & ægro per visum apparuit ) in continenti sanus, robustus atquæ incolumis euasit. compertusq; fuit. IV. Angelæ la Cibassa, binis febribus tertianis continuis ac malignis cum dolore capitis & stomachi, flatuumque copia per dies viginti septem, acriter cruciatæ, oppressæ, à Medico proclamatæ, morti proximæ, iamque sex horarum spatio in agonia constitutæ, quæ Matris hortatu Sanctæ huius ope innocatâ, dein oleo ex lampade ante eiusdem aram pendulâ desumpto, vnctâ in colo, pectore ac stomacho statim, atque in continenti, pristinae salutis, cum omnimoda recuperatione virium, fuit restituta. Hæc approbatis, sufficiant, siquidem Canonizatio Solennissima die XII. April. 1671. subsecuta est. At, desunt verba, calamus mihi non datur exactus, ut vel pauca exprimam hic, Quæ? & Qualiter? peracta Romæ, & vbique in hoc nostro, & apud Antipodas, Hemispherio, gestientium animorum & congratulantium tantæ Sanctæ, & gloriosæ Virgini Rosæ! Quæ, ô vtinam & pro nobis oret, suscipiatq; ad protegendum, Regnum Poloniæ. Fiat, Fiat.





Biblioteka Jagiellońska



stdr0024903

